

EKALESIA FAAPOTOPOTOGA KERISIANO SAMOA

CONGREGATIONAL CHRISTIAN CHURCH SAMOA

TUSI MO FAIA'OGA O AOGA ASO SA

SUNDAY SCHOOL TEACHERS' TEXTBOOK

2 0 2 4



VASEGA LAITI

ELEMENTARY CLASS

(8 – 10 tausaga)

MATAGALUEGA O A'OA'OGA KERISIANO

DEPARTMENT OF CHRISTIAN EDUCATION

UPU TOMUA

E mua'i faatalofa ma faafeiloai atu i le paia tele o le Ekalesia Faapotopotoga Kerisiano Samoa i ona tulaga faalupeina, i le Suafa pele o Iesu Keriso lo tatou Taitai Sili. Ua faamalo le soifua manuia ia outou susuga i Toeaina, susuga i Faafeagaiga, Faifeau, A'oa'o ma Faletua, tainane foi afioga i Tiakono, susuga i alii ma tamaitai Faiaoga o tatou Aoga Aso Sa, faapea foi peresetene ma taitai o tatou Autalavou. Ia viia lo tatou Alii, i la outou molimau atu, o fita i tuga ai mo le Alii ma le Tala Lelei, e ala atu i mataupu a le Aoga Aso Sa ma Autalavou.

Ua tatou talitonu, o le Tusi Paia o le Upu a le Atua mo tagata uma, ma ua i ai i totonu vaega uma ua tatou naunau ia iloa, ina ia tumau mausali pea lo tatou sootaga lelei ma le Atua, ma ia tatou ola ai i le ala tatau e tusa ma lona finagalo. O le mea lea ua tatou talitonu ai, i le matuā taua o le a'oa'oina tatau o fanau laiti ma talavou mai le Tusi Paia. E ao ina a'oa'oina atu ma le faautauta lelei, le uiga moni o vaega o le Tusi Paia ua fia a'oa'oina atu, i se auala talafeagai e tusa ma le matutua ua i ai tamaiti.

1. O le Tusi o Aoga Aso Sa ma Autalavou, ua saunia lava faapitoa mo Aoga Aso Sa ma Autalavou a le Ekalesia Faapotopotoga Kerisiano Samoa. O lona uiga o le meatotino lava a le EFKS, e le faatagaina faaletulafono ona toe lomia e se tasi, e aunoa ma le faatagaga a le Ekalesia. O lea e fautuaina ai foi le Aufaigaluega, o faiaoga o Aoga Aso Sa ma Taitai o Autalavou, i le taua o le teu faalelei pea o Tusi Aoga, e toe saili i ai mo se fesoasoani pe a mommia.
2. O Mataupu o Tusi Aoga Aso Sa ma Autalavou 2024, ua maua lea i le upega Tafailagi (website) a le EFKS; www.cccs.org.ws. Faamolemole ia fesootai mai lo tatou Ofisa i Mulinuu mo se fesoasoani, ma nisi vaega e fia malamalama i ai, i le telefoni 24340, po o le e-meli-extneduc@cccs.org.ws.
3. Ua lē o toe fa'aalia i le faasologa o Mataupu i Aso Sa taitasi, vaega masani o le a'oa'oina o mataupu, e pei o le Tatalo Amata, Faafeiloai le vasega, faamanatu mataupu talu ai, tatalo e faapaia ai le sene ma le Tatalo Faaiu. Peitai o vaega masani nei e tatau lava ona fai i Mataupu o Aso Sa taitasi.
4. Mo le silafia e Tamā o le Ekalesia ma le aufaigaluega faifeau, e i ai le taimi e toe saili mai ai e lo outou mamalu le ofisa o le MAK, mo nisi Tusi Aoga. Peitai, ua māua e le ofisa nei, o nisi tagata, e lē o ni tagata lotu iā tatou, auā latou te leiloa le suafa o lana faifeau. O lea e tatalo atu ai, o le a lē toe taliaina ni tagata faapea e omai i ni Tusi, sei vagana faafeagaiga ma ē omai ma se faamaoniga mai lana faifeau. E lē mafai foi ona faamatuu atu ni Tusi Aoga i nisi o la matou aufaigaluega e aunoa ma se faamaoniga mai le faifeau.
5. Afai ua i ai se lapē i le galuega nei, e matua atu i la outou tofā faale-Atua e magalo ai le aufaigaluega vaivai. Pe afai foi e i ai ni fautuaga taua mo le faaleleia atili o le galuega, faamolemole fesoota'i mai lo tatou Ofisa i tuatasi o i luga, pe lafo mai i le Pusa meli 163, Apia.

6. Ua saunia le Tusi Aoga mo le Vasega Laiti 2024, e le susuga ia Panapa Alafau FS, Farani Pauga FS, Falealii Afamasaga FS

Ia faamanuia le Atua i le galuega o lenei tausaga, auā le a'oa'oina o alo ma fanau a le Ekalesia, ina ia tutupu a'e ma le fiafia e faitau le Tusi Paia ma ola matata'u i le Atua.

Soifua ma ia manuia
O la outou auauna

Malieifua Taniesu
(Faatonu A'oa'oga Kerisiano)

VASEGA LAITI 2024
MANATU AOAO: O LE ATUA E OU MEA UMA.

**MANATU TAIALA O IANUARI & FEPUARI: IA MATATAU I LE ATUA
IANUARI**

- 28 Na faia e le Atua le tagata
(ASO SA O TUPULAGA) Kenese 2: 7 – 9

FEPUARI

- | | | |
|----|---------------------------------------|-----------------------|
| 04 | O uluai soo na filifilia e Iesu | Mataio 4: 18 – 20 |
| 11 | E leaga le lē usitai | Kenese 3: 11 – 13 |
| 18 | Ua lē faalogo Saulo i le Atua | 1 Samuelu 15: 20 – 24 |
| 25 | Ua pepelo Anania ma Safaira i le Atua | Galuega 5: 1 – 4 |

MANATU TAIALA O MATI: IA FAIA GALUEGA LELEI MO ISI

MATI

- | | | |
|----|---|-------------------|
| 3 | Ua faalogo Aperaamo i le Atua | Kenese 22: 2 – 12 |
| 10 | Ua mulumulu e Iesu vae o ona soo | Ioane 13: 1 – 5 |
| 17 | O tulafono a le Atua | Esoto 20: 3 – 17 |
| 24 | Ua tietie Iesu i le asini (ASO SA LAUPAMA) | Mataio 21: 1 – 11 |
| 31 | Ua toetu Iesu (ASO SA TOETU) | Mareko 16: 1 – 8 |

MANATU TAIALA O APERILA: VALAAUINA E LE ATUA

APERILA

- | | | |
|----|---------------------------|---------------------|
| 07 | O le valaaufina o Ieremia | Ieremia 1: 5 – 10 |
| 14 | O le naseri a le Atua | Faamasino 13: 1 – 5 |
| 21 | Ua fai Iosefa ma lavea'i | Kenese 45: 1 – 9 |
| 28 | O Ioane le Papatiso | Mataio 3: 1 – 6 |

MANATU TAIALA O ME: LOTO FESOOASOANI

ME

- | | | |
|----|---|------------------|
| 05 | O le Agaga Paia | Galuega 2: 1 – 4 |
| 12 | O le tinā lototeli (ASO SA TINĀ) | Eseta 4: 15 – 17 |
| 19 | FONOTELE | |
| 26 | Fesoasoani i so o se tagata | Luka10: 29 – 37 |

MANATU TAIALA O IUNI: TUMAU I LE ATUA

IUNI

02	O Setefano le tagata lototele	Galuega 7: 51 – 60
9	Tumau i le Atua e manuia ai	Tanielu 6: 1 – 10
16	O le oti o Aikupito	Esoto 14: 24 – 28
23	Ua liliuina Saulo e le Alii	Galuega 9: 3 – 6
30	Ua tumau le loto o Iopu i le Atua	Iopu 2: 6 – 10

MANATU TAIALA O IULAI: E SILAFIA E LE ATUA MEA UMA

IULAI

07	Aua le ola tusitusi lima	Mataio 7: 1 – 5
14	Ua aoao Iesu i le tatalo	Mataio 6: 9 - 13
21	O le malaia na oo ia Kiasi	2 Tupu 5: 25 – 27
28	O le manuia mo fanau	Efeso 6: 1 – 3

MANATU TAIALA O AOKUSO: O LE ATUA LE TAIALA MO AIGA

AOKUSO

04	O le auaiga o Iesu	Mareko 3: 31 – 35
11	O Konelio o se tamā faatuatua ma matau i le Atua (ASO SA O TAMĀ)	Galuega 10: 1 – 4
18	Ua faamalolo e Iesu le tagata ma'i i Petesa	Ioane 5: 2 – 9
25	Ua vaeluaina e Elia le vai o Ioritana i le mana o le Alii	2 Tupu 2: 6 – 8

MANATU TAIALA O SETEMA MA OKETOPA:

E LEOLEO MAI LE ATUA IA I TATOU.

SETEMA

01	Ua fa'aali Iesu i ona soo (ASO SA TALALELEI)	Mareko 16: 14 – 18.
08	Ua faasaoina e Raava tagata Israelu	Iosua 2: 14 – 16
15	O le vai o Mara	Esoto 15: 22 – 25
22	Ua tulia e Iesu temoni	Luka 8: 26 – 34
29	O Tavita le Leoleo Mamoe	1 Samuelu 16: 11 – 17

OKETOPA

06	TAPENAGA LOTU TAMAITI	
13	LOTU TAMAITI	
20	MALOLOGA O LE LOTU TAMAITI	
27	Ia iloa ona toe faafoi o le faafetai	Luka 17: 11 – 19

MANATU TAIALA O NOVEMA: O LE ATUA TATOU TE MANUIA AI

NOVEMA

03	O le Alofa Tunoa o le Atua	Luka 11: 9 – 10
10	Ua faatoga Solomona i le Atua	1 Tupu 3: 7 – 14
17	Ua faia e Iesu le vavega i Kana	Ioane 2: 1 – 10
24	Ua fasia e Samasoni le leona taanoa	Faamasino 14: 5 – 6

MANATU TAIALA O TESEMA: O LE ATUA UA AFIO MAI I LE LALOLAGI

TESEMA

01	Ua fanau Iesu le Faaola	Luka 2: 1 – 7
08	O meaalofa a makoi mo Iesu	Mataio 2: 9 – 11

VASEGA LAITI 2024

MANATU TAIALA O IANUARI & FEPUARI: IA MATATA'U I LE ATUA.

E faatalofa i le tatou vasega i lenei taeao. Ia tatou taufai viia ma faafetaia le alofa ma le agalelei o le Atua, ua mafai ona tatou aulia mai le amataga o a tatou aoga Aso Sa i lenei foi tausaga fou, 2024. Ia manatua o le mata'u i le Atua, o lo tatou iloa lelei lea o lona finagalo, e ao ona tatou ola ai ma tatou usitai i ai. Ia tatou fiafia e faalogo i mataupu tau i lana Afio, ma tatou usitai i ana Afioga Paia aua o le matau i le Atua o le amataga lea o le poto.

ASO SA: **28 IANUARI 2024. (Aso Sa Tupulaga).**

MATAUPU: **NA FAIA E LE ATUA LE TAGATA.**

SINI: Ia malamalama tamaiti, na faia ai e le Atua le tagata ina ia ola.

TUSI FAITAU: Kenese 2: 7 – 9

FESOASOANI MO FAIAOGA:

Talofa tamati! O a mai outou i lenei taeao? Ioe, faafetai i le Atua o lo o manuia uma i tatou le fanau a tamaiti! Lelei, o le fesili, O ai na faia i tatou tamaiti, ia po o ai na faia oe? Ioe, o le Atua a tamaiti. Ia faalogo lelei mai tamaiti, o le tatou mataupu i lenei taeao. “Na faia e le Atua le tagata”, sei fai faatas, “Na faia e le Atua le tagata”.

Fai mai ina ua uma ona faia e le Atua le lagi ma le lalolagi ma mea uma lava, ona Ia faia loa lea o le tagata, e faai i ai lana foafoaga paia i le aso lona ono, aua o le aso lona fitu o le Sapati lea na faapaiaina e le Atua e malolo ai o Ia, lea foi ua faapena ona tatou malolo ai mai feau ma galuega, e ono lava aso e pule ai tatou, ao le Aso Sa tatou te o ai i le aoga Aso Sa ma le lotu ma malolo ai e le faia ai ni feau.

Ioe, lea e faimai le fuaiupu e 7, ona faia lea e le Alii le Atua o le tagata i le efuefu o le eleele, ma ua manava i ona pogaiisu o le mānava ola, ona avea ai lea o le tagata ma tagata ola. E ese le matautia ma le ofoofogia o le malosi o le mana o le Atua a tamaiti! O le Atua o le Atua o le ola, o lona finagalo paia ia faia le tagata e avea ma tagata ola ia ava ma matau ia te Ia.

O le tatou mataupu lena i lenei taeao, ao se faamanatu foi lea lea mo'i tatou le fanau. Ia lelei la tatou amio, ia tatou ola usiusitai i o tatou matua, ma o tatou faiaoga, ia tatou loto alolofa i e o manaomia le fesoasoani ma ia tatou toaaga mai i le lotu ma le aoga Aso Sa, e manuia ai tatou, ma o ī e iloa ai, e matata'u i tatou i le Atua aua na faia i tatou e Ia. Manuia tele outou le fanau!

GALUEGA FAATINO:

Faatumu avanoa o lo o i lalo i upu nei; mānava, ola, efuefu, faia, pogaiisu, Atua, tagata, avea.

Ona(1)..... lea e le Alii le(2)..... o le tagata i le(3)..... o le eleele, ma ua(4)..... i ona(5)..... o le mānava ola; ona(6)..... ai lea o le(7)..... ma tagata(8).....

Tali: (1) faia, (2) Atua, (3) efuefu, (4) manava, (5) pogaiisu, (6) avea, (7) tagata, (8) ola.

PESE: Na faia a'u e le Atua x2....

Ua ou fiafia na faia au e le Atua.
O tamatamai lima, o tamatamai vae
O ou tulilima ma ou tulivae.
O suilapalapa ma alafau
Lou tino manaia o le Atua na ia faia.

A'OA'OGA:

1. Na faia e le Atua mea uma.
2. E aumai e le Atua le ola ia i tatou.

NA FAIA E LE ATUA LE TAGATA



ASO SA: **04 FEPUARI, 2024.**

MATAUPU: **O ULUAI SOO NA FILIFILIA E IESU**

SINI: Ia malamalama le vasega i ē na muamua filifilia e Iesu e fai mona soo.

TUSI FAITAU: Mataio 4: 18 – 20

FESOASOANI MO FAIAOGA:

Talofa tamaiti, o le tatou mataupu i lenei taeao, “O ULUAI SOO NA FILIFILIA E IESU”. O le a le uiga o le upu soo a tamaiti? Ioe, o le soo o le tagata lea ua mulimuli i ala ma usitai i le finagalo o lona matai. O le soo e fesoasoani e faailoa ma faatino le finagalo o lona matai, ia po o lona ta’ita’i.

Tamaiti, lea sa faitau tatou i le Tusi Paia, lea o lo o ta’u mai ai, faimai ua savali ane Iesu e latalata ane i le vai o Kalilaia, ona silafia lea e Ia le au uso e toalua, o Simona Peteru ma Aneterea, o lo o fai le la faiva, ia pe o lo o fagogota i laua. Ona valaaau atu ai lea o Iesu ia te i laua, ia mulimuli atu ia te Ia, na te faia i laua ma faifaiva i tagata. Faimai ona usitai ai lea o i laua nei i le fetalaiga a Iesu, ua la tuua o la

upega sa fagogota ai, ae mulimli ia Iesu. Ioe tamaiti, o i laua na o Peteru, ma lona uso o Anetarea na muamua lava filifilia e Iesu e fai mona soo.

O se feau mo i tatou tamaiti, aua ne'i o tatou faasili i o tatou manatu ni a tatou feau po o ni mea o lenei lalolagi, nai lo o le faia o le finagalo o le Atua. Ia fai i tatou ma soo o Iesu, ia tatou faia faataitaiga lelei i isi tamaiti i le faalogo ma le usitai i matua faapea ai ma faiaoga. Ia tatou faamuamua le finagalo o le Atua e iloa ai ua tatou ava ma matatau i le Atua. Manatua foi tamaiti o le matau i le Atua o le amataga lea o le poto.

GALUEGA FAATINO: **FAAFETAUI UPU**

Faafetaui upu i o latou uiga sao ua tuuina atu.

UPU **UIGA**

- | | |
|------------------|--------------------------------|
| 1. tofia | savali atu i tua o le o muamua |
| 2. usitai | fagota. |
| 3. faifaiva | faalogo ma fai. |
| 4. tuua | filifilia. |
| 5. mulimuli | lafoai. |

PESE: Ou te faia outou ma faifaiva i tagata x2,
 Pe afai tou te mulimuli ia te au x3.
 Ou te faia outou ma faifaiva i tagata,
 Pe afai tou te mulimuli ia te au.

A'OA'OGA:

1. Ia mulimuli tatou uma ia Iesu.
2. Ia e ava i lou tamā ma lou tinā.
3. Faalogo ma usitai i faiaoga

ULUAI SOO NA FILIFILIA E IESU



ASO SA:

11 FEPUARI 2024.

MATAUPU: E LEAGA LE LĒ USITA'I.

SINI: Ia malamalama le vasega, o le lē usitai, e feagai ai ma puapuaga.

TUSI FAITAU: Kenese 3: 11 – 13.

FESOASOANI MO FAIAOGA:

Talofa tamaiti, O manuia mai outou i lenei taeao?. Ia viia ma faafetaia pea le alofa o le Atua o lo o manuia i tatou uma i lenei taeao.

O le tatou mataupu i lenei Aso Sa, “E leaga le lē usitai”. O ai na te iloa o le a le uiga o le upu lē usitai a tamaiti?. Ioe. O le lē usitai o le lē faia lea o se faatonuga na faatonu atu e se tasi ina ia faia, a tamaiti! O le uiga faafeagai o le upu usitai, o le lē usitai. Ae sili ona lelei atu le usitai, nai lo o le lē usitai, aua lea foi e molimau mai ai le Tusi Paia fai mai, e sili le usitai i le ga’o o le mamoe po’ā, ma le faalogo e sili lea i lo o le taulaga.

Sa fetalai le Atua ia Atamu ma Eva e aua ne’i o la ‘aia le fua o le laau e iloa ai le lelei ma le leaga o lo o i totonu o le faatoaga i Etena, peitai, sa faaosoosoina e le gata Eva ina ia tago e ‘ai e pupula ai o la mata ma avea ai i laua ma Atua. Na ave foi e Eva le fua o le laau ia Atamu ma ua ‘ai ai foi o ia. Ua lē usitai i laua i le Atua, ae ua usitai i le gata. Ona asiiasi ane lea o le Atua i le faatoaga ma iloa ai ua lē usitai i laua i le faatonuga a le Atua. Sa tuuai e Eva le leaga i le gata, ae na tuuai e Atamu ia Eva o ia ua na faaseseina o ia.

O le i’uga o le tala tamaiti, na faamalaia e le Atua le gata, e faapena foi ia Atamu ma Eva. O le faasalaga, o le gata o le a ‘ai i le efuefu, ma sosolo i lona manava, O Eva e fanau o ia ma le tigā, a o Atamu o le a ai o ia ma le afu o ona mata. Tamaiti, o le uiga lea o le tatou mataupu i lenei taeao, “E leaga le lē usitai”, aua e oo mai ai puapuaga ia i tatou, faapei ona faasalaina ai Atamu ma Eva. Ua aoao mai foi le tatou mataupu i lenei taeao, ina ia tatou usitai i faatonuga a o tatou matua ma o tatou faiaoga e manuia ai, ma le oo mai ai puapuaga ia i tatou. Ia manatua lea lava sa usitaia e Iesu le finagalo o lona Tamā, ma ia faia ai le faaolataga mo i tatou o tagata agasala.

GALUEGA FAATINO : TALIGA FESILI

Tali mai i fesili nei :

1. O le a se faatonuga na faia e le Atua ia Atamu ma Eva?.

Tali: Na poloai le Atua la te aai i fua o laau uma o le faatoaga ae tasi le laau e aua nei o la aai ai.

2. Aisea na ai ai e Eva le fua o le laau na faasa e le Atua?.

Tali: Na faaosoosoina o ia e le gata.

3. Aisea na ai ai e Atamu le fua o le laau?.

Tali: Na faaseseina o ia e Eva.

4. O le a la se mea na tupu ina ua le usitai Eva ma Atamu?.

Tali: Ua faa-malaia e le Atua.

PESE:

Faalogo ma usitai
E leai se isi ala
E fiafia Iesu i tamaiti usitai.
Faalogo ma usitai
E leai se isi ala,
E fiafia ai Iesu
Na o le faalogo ma usitai.
Faalogo ma usitai, faalogo ma usitai,
E fiafia Iesu i tamaiti usitai,
Faalogo ma usitai e leai se isi ala,
E fiafia ai Iesu na o le faalogo ma usitai.

A'OA'OGA:

1. O le lē usitai e oo mai ai papuaga ia i tatou.
2. E manuia le tagata e ola usitai.
3. Usitai i matua e tele ai aso e te ola ai.

UA LE USITAI LE TAGATA I LE ATUA



ASO SA: **18 FEPUARI, 2024.**

MATAUPU: UA LE FAALOGO SAULO I LE ATUA.

SINI: Ia malamalama le vasega o le lē faalogo o Saulo, na aveese ai le tulaga mamalu sa ia te ia.

TUSI FAITAU: 1 Samuelu 15: 20 – 24.

FESOASOANI MO FAIAOGA:

O le tatou mataupu i lenei taeao tamaiti, o le tala ia Saulo. Tamaiti o Saulo o le uluai tupu ia po o le tupu muamua lea na faauuina e le Atua e fai ma tupu o Israelu, ina ua latou mananao e fai so latou tupu faapei o isi o malo o le lalolagi. Sa le fiafia ai le Atua i lo latou manao, peitai sa faia lava e le Atua e pei ona latou mananao i ai. Na poloai le Atua ia Samuelu e fai atu ia Saulo, e ō e faaumatia le nuu o Amaleka, O tagata uma atoa ma meaola uma, ia aua lava nei faasaoina se mea e tasi. Peitai ua le usitai Saulo i le Atua, ae ua ia faasaoina le tupu o Amaleka, faatasi ai ma nisi o mamoe ma povi pepeti, faimai e osi ai taulaga i le Alii.

Ua silafia e le Atua ua le faalogo Saulo e tusa ma lana faatonuga ona toe auina atu ai le o Samuelu e faailoa ia Saulo le finagalo o le Atua. Ona oo atu ai lea o Samuelu ma fai atu ia Saulo pe aisea ua ia le faia ai le finagalo o le Atua na auina atu ai o ia e faataunu, ae tali Saulo ua ia faasaoina mai manu pepeti, o mamoe ma povi e osi ai le taulaga i le Atua. Ua tali atu Samuelu, e le sili ea le faalogo i lo o taulaga, ma le usitai e sili i le ga'o o le mamoe poa. O le mea lea ua aveeseina ai e le Atua le malo ma le mamalu na ia te oe, ae tuuina atu i se tasi e sili atu nai lo o oe.

Ua salamo Saulo ma faatoese ia Samuelu, ae paga lea ua masaa le ipuvai ua le toe maua mai. Tamaiti o se feau mo i tatou, ia tatou faalogo lelei ma tatou usitai i e aoaoina ma faatonuina mai i tatou, ina ia tatou manuia ai ma fiafia ai Jesu ia i tatou. Manatua o le lē faalogo o Saulo i le poloaiga a le Atua, na aveeseina ai le tulaga o le tupu sa ia te ia ae tuuina atu i se tasi e sili atu ia te ia.

Uiga o Upu:

i) Akako - tupu o le nuu o Amaleka.

GALUEGA FAATINO: Faatinoga.

Ia fai ni taga o le pese (Haka) ua tuuina atu upu.

Saulo Saulo e, faalogo mai ia,
Ō i Amaleka tou te faaumatia.
Aua nei i ai o se mea e tuua,
Aua o le finagalo lea o le Atua.
Peitai Saulo ua le faalogo,
Ua tuu le feau ae fai lona poto.
Talofa e ua le manuia,
Ua le toe i ai le Atua ia te ia. Hee!

PESE: Trust and Obey

A'OA'OGA:

1. O le faalogo e sili lea i lo o le taulaga.
2. O le usitai e sili i le ga'o o mamoe po'a.
3. Ia usitai tagata uma i le Atua.

UA LE FAALOGO SAULO I LE ATUA



ASO SA:

25 FEPUARI 2024.

MATAUPU: UA PEPELO ANANIA MA SAFAIRA I LE ATUA.

SINI: Ia malamalama le vasega o le lē faamaoni o Anania ma Safaira na feoi ai i la'ua.

TUSI FAITAU: Galuega 5: 1 – 4.

FESOASOANI MO FAIAOGA:

O le mataupu i lenei taeao e faatatau i le ulugalii, o le tamaloa e igoa ia Anania, a o le fafine e igoa ia Safaira. Sa fai le la folafolaga i le au aposetolo, (soo o Iesu) a uma ona faatauina lo la fanua, o le a tuuina uma atu le tupe o le tau o le fanua mo le galuega a le Atua. Peitai, ua la le savavali ai, ua la le ave uma le tupe o le tau o le fanua e pei ona o la folafola atu, ae ua tuu e i laua le isi vaega o tupe.

Ona oo atu lea o Anania ma fesiligia ai e Peteru po o le a le mea ua o la faia ai lea tulaga. Ua fai atu foi Peteru o le mea ua tupu ua faatumuina i laua e le agaga o Satani, lea ua mafua ai ona o la pepelo i le Agaga Paia o le Atua. Ona pa'u ai lea o Anania ma ua oti o ia. Sa faapena foi le mea na oo i le fafine o Safaira, na fesiligia foi o ia e Peteru, pe aisea ua tuu ai ma laua isi vaega o le tau o le fanua. Na uma foi ona fesiligia o ia e Peteru ona oti ai foi lea o ia faapei o lana tane o Anania.

O nei faailoga matautia uma na faia e le au aposetolo i luma o le motu o tagata, na avea lava lea ma ala ua matata'u ai le toatele o'i latou, i le mamana ma le silisiliere o le mamalu o le Atua. Tamaiti, o se aoaoga foi lea moi tatou, aua tatou te pepelo i le Atua, a ia tatou ava ma matatau ia te Ia. O a ni mea e mafai ona tatou faia e viia ai le Atua, ia tatou faia mea uma i le agaga ma le faamaoni, aua e mafai e le Atua ona fesoasoani mai i o tatou vaivaiga ma o tatou mafatiaga e ala i le fesoasoani mai o lona Agaga Paia ia i tatou.

GALUEGA FAATINO: TALI I LE SA'O PO O LE SESE.

1. O Anania na oti ona lona alofa.

Tali: (sese).

2. O Safaira o le afafine o Anania.

Tali: (sese).

3. O le pepelo o Anania ma Safaira na malaia ai i laua.

Tali: (sa'o).

4. E matautia vavega a le Atua na auala mai ia Peteru ma le au soo.

Tali: (sa'o).

5. E le lelei le iuga o le tauto pepelo.

Tali: (sa'o).

PESE: Ave lou ola ia aoga....Pese 157

A'OA'OGA:

1. Ia savali i ala o le Atua.

2. Faamaoni i au folafolaga

3. E le o se mea lelei le ola pepelo.

UA PEPELO ANANIA MA SAFAIRA I LE ATUA



MANATU TAIALA O MATI: IA FAIA GALUEGA LELEI MO ISI.

O lo tatou faia o galuega lelei mo isi tagata, o lo tatou usitaia lava lea o le finagalo o le Atua mo i tatou. Faimai le tulafono a le Atua i le Feagaiga Fou, Ia e alofa i le Atua ma lou loto atoa, ma lou manatu atoa, ma lou malosi atoa. Ia e alofa atu foi i le lua te tuaoi, ia pei o oe lava ia te oe. O lona uiga o isi tagata e pei ona ta'ua, o o tatou tuaoi a ia, e tatau ona tatou faia i ai galuega lelei.

ASO SA: **03 MATI 2023.**

MATAUPU: **UA FAALOGO APERAAMO I LE ATUA.**

SINI: Ia malamalama le vasega o le usitai o Aperaamo i le Atua, na faamanuina ai o ia e le Atua.

TUSI FAITAU: Kenese 22: 2 – 12.

FESOASOANI MO FAIAOGA :

Talofa tamaiti. O le tatou mataupu i lenei taeao, ua faalogo Aperaamo i le Atua. Na silafia a e le Atua e pele lava ia Aperaamo si ona atalii e toatasi o Isaako. O le ala lea na ia tofotofoina ai Aperaamo pe usitai ia te Ia pe leai. Sa ia faatonu ia Aperaamo ina ia ave lona atalii e toatasi ma la o i le nuu o Moria e osi ai le taulaga i le Atua. Sa usitaia e Aperaamo le finagalo o le Atua ma latou o ai loa ma ana auauna ma lona atalii.

Ina ua latalata i latou i le mea e osi ai le taulaga, ona vavao ai lea e Aperaamo ana auauna e talimau atu, ae sei o la o ma lona atalii e fai le tapuaiga i le Atua. Ina ua o la taunu i le mea e osi ai le taulaga, ona faaee lea e Aperaamo o fafie i le fata ma ia tuu ai i luga lona atalii o Isaako, ona ia aapa atu lea i le naifi ia po o le polo, o le a faaoo le oti i lona atalii, peitai ua faateia o ia i le leo o le agelu na valaau ifo ma vavao ia te ia. Ua silafia foi e le Atua ua usitai lava Aperaamo ia te Ia, ona saunia lea e le Atua o le tamai mamoe e osi ai le taulaga e sui ai Isaako lona atalii. Ona amata ai lea ona faamanuia le Atua ia Aperaamo ma ona aiga e oo mai lava ia i tatou uma. Tamaiti o le usitai o Aperaamo ma lona faatuatua, ua manuia ai aiga uma o le lalolagi e oo mai lava ia i tatou.

Uiga o Upu:

- i) faatuatua - talitonu i mea e le o vaaia e mata.
- ii) polo - naifi agaese.

GALUEGA FAATINO:


Manaia foi ae faatino le tala, faapuupuu a ia manino ma malamalama ai tamaiti

PESE: Aperaamo tamā ma lana fanau.....

A'OA'OGA :

1. Tuu o tatou loto ae fai le finagalo o le Atua.
2. Toaga e tatalo i le Atua.
3. O Aperaamo o se tamā e usitai i le Atua.

UA FAALOGO APERAAMO I LE ATUA



ASO SA:

10 MATI 2024.

MATAUPU: UA MULUMULU E IESU VAE O ONA SOO.

SINI: Ia malamalama le vasega, i galuega lelei na faia e Iesu i ona soo.

TUSI FAITAU: Ioane 13: 1 – 5.

FESOOASOANI MO FAIAOGA :

Talofa tamaiti. O le tatou mataupu i lenei taeao, *UA MULUMULU E IESU VAE O ONA SOO*.

Fai mai ua oo i le taimi o le talisuaga mulimuli a Iesu ma ona soo o le paseka, ona tulai ai lea o Iesu ua ia tago i le apa vai ma le ie soloi, ua Ia mulumulu i vae o ona soo ma soloi i le ie ua ia fusi ai. Ona oo atu ai lea o Ia ia Simona, ae fai mai o ia, e te le mulumulu lava i ou vae. Sa fetalai atu ai lea Iesu ia te ia, afai ou te le mulumulu ia te oe, e leai sou tofi faatasi ma au, ona manao ai lea o Peteru e mulumulu uma ma ona lima ma lona ulu. A o la Iesu, o le ua taele e tau o ona vae e mulumulu ae mama uma ai.

E tele ni aoaoga ua maua i le mulumuluina e Iesu o vae o ona soo, e le gata i le ausoo ae faapena foi tatou le fanau. Ua tatou iloa ai o Iesu o se taitai loto maulalo, e ui o Ia o le taitai, ae ua ia faia se faataitaiga lelei e ala i lona mulumuluina lea o vae o ona soo. E lē fia mapo tofi, ae fia avea ma auauna i so o se tagata. O lona finagalo ia faapena foi ona maua e lona ausoo le agaga lea o le fealolofaai, ma le femulumulu'a'i o le isi i le tasi. O le a se mea e vaivai ai le isi uso, agalelei ma fesoasoani le isi i le tasi, aua e mauaa ai ma malosi ai lo latou faatuatua, pe a tutu faatasi ma galulue faatasi i latou. Ia fefaamafanafanaai, ma ia maopopo i latou i lo latou valaauna mo le feau ma le galuega o le folafolaina o le Tala Lelei ia Iesu ma le malo o le Atua. O lē a e tumau ia Iesu, e ui e oti o ia, ae mautinoa e toe faatuina o ia e Iesu i le manumalo i le aso o le Alii, faapei ona toetu mai o Iesu mai le oti ma le tuugamau.

GALUEGA FAATINO: FAATINO LE TALA.


Ia i ai se tasi e avea ma Iesu, o se isi e avea ma Peteru, ia i ai se solo ma se apavai ona alu lea e faataitai ona mulumulu ia pe fufulu alofivae o isi tamaiti ma faataitai i upu na fai e Iesu ma Peteru.

PESE: A Tumau ia Iesu....

A'OA'OGA:

1. Ia fai i tatou ma auauna i le Alii.
2. Ia fesoasoani i e ua mafatia.
3. Tumau ma talitonu ia Iesu.

UA MULUMULU E IESU VAE O ONA SOO



MATAUPU: O TULAFONO A LE ATUA.

SINI: Ia malamalama le vasega i tulafono a le Atua, e taitaiina ai o latou olaga tuputupua'e.

TUSI FAITAU: Esoto 20 : 3 – 17.

FESOASOANI MO FAIAOGA :

Tamaiti o tulafono, o sa, ia po o ni alafua ma ni aiaiga ia o mea ua pasia ma ua autasi i ai se vaega o ni tagata e limataitaiina ai i tatou, ma e tatau ona usitai i ai tagata uma. E i ai tulafono a nuu, eklesia, e faapena foi le malo. A lē usitai i tulafono, ona faasalaina lea o i tatou. O le tatou mataupu la i lenei taeao, “*O TULAFONO A LE ATUA*”.

Fai mai a o i ai le nuu o Isaraelu i la latou malaga i le vao e latalata ane i le mauga o Sinai, ina ua o ese mai mai le nuu o Aikupito sa nofo pologa ai, o inā i le mauga o Sinai na ta'uina ifo ai e le Atua ia Mose tulafono e ao ona faailoa atu i lona nuu o Isaraelu ina ia mulimulitai ma usitai i ai. O le fa'aaliga manino foi lea o lona finagalo paia mo ona tagata aemaise o lona nuu filifilia. O le tulafono muamua e oo i le tulafono e fa, o lo o faamamafaina ai le va tapuia o le tagata ma le Atua, peitai o le tulafono e lima e oo i le sefulu, o loo faamamafaina ai le va feagai ai o le tasi tagata i le isi.

Ioe tamaiti, O le Atua o le tamā o ī tatou uma. E manaomia e le Atua lo tatou usitai i ana tulafono ua faailoa mai i ana afioga paia moi tatou. Ua tatou iloa o le tamaitiiti e usitai ma faalogo i tulafono a le Atua, e maua e ia le mea lelei, ma e manuia lona olaga. O le ala foi lea e tatau ai lava ona tatou usitai i tulafono a le Atua e manuia ma fiafia ai o tatou matua e faapena foi o tatou aiga, ae sili ona fiafia ai lo tatou Alii o Iesu ia i tatou.

GALUEGA FAATINO: Faitau, ma tauloto tulafono e 10.

PESE: Faitau le Tusi Paia ma tatalo i aso uma.....

A'OA'OGA:

1. Usitai i tulafono ma poloaiga a le Atua.
2. Toaga e faitau le Tusi Paia i aso uma.
3. Ia toaga i le lotu ma le aoga Aso Sa.

TULAFONO A LE ATUA



ASO SA: 24 MATI 2024.

MATAUPU: UA TIETIE IESU I LE ASINI. (ASO SA LAUPAMA)

SINI: Ia malamalama le vasega, o le tietie o Iesu i le Asini, o le faailoga o le loto maulalo, o le agamalu ma le filemu .

TUSI FAITAU: Mataio 21:1 - 11.

FESOASOANI MO FAIAOGA:

Tamaiti o manatua e outou o le a se mea o lo o faamanatuina i le Aso Sa lenei?. Ioe o le Aso Sa o le laupama, ia po o le aso o le malaga faatupu a Iesu i Ierusalema lea sa fa'aaoga ai e tagata lau o laau e pei o laupama e fola ai le ala, e afio atu ai Iesu.

Fai mai ina ua latalata i Ierusalema, ona auina le e Iesu ona soo e toalua e le o taua o la igoa e tusa ai ma le molimau a Mataio, ina ia tatala mai le asini. O le asini lea na tietie ai loa Iesu ma ulufale atu ai i Ierusalema.

O le fa'aaogaina ai e Iesu o le asini e tietie ai, o le faailoga lea o le loto maulalo, agamalu ma le filemu. O le tele o tupu e fa'aaoga e latou kariota ma taavale matagofie e feoai ai, a o Iesu na fa'aaoga e ia le asini. Na iloa e le motu o tagata Iutaia, o Iesu lea ua afio atu o lo latou tupu, o le ala lea na latou salaina ai lau o laau ma fola o latou ofu i le ala ma alalaga, “Osana i le alo o Tavita, ia manuia le afio mai i le suafa o le Alii, Osana i mea aupito i luga”. O upu faaeaea a tagata ina ua afio atu lo latou tupu.

O se feau foi lea mo i tatou le fanau, ia tatou agamalu ma ia maua e i tatou le loto maulalo aua e faaeaina e Iesu le tagata loto maulalo.

GALUEGA FAATINO: FAATINOGA.

Faatino le vaaiga lea i le Malaga faatupu a Iesu.

PESE: Osana pepese tamaiti uma.

A'OA'OGA:

1. E faaeaina le tamaitiiti e loto maulalo.
2. O Iesu o le Tupu.
3. Ia mulimuli ia Iesu.

UA TIETIE IESU I LE ASINI



ASO SA:

31 MATI 2024.

MATAUPU: **UA TOETU IESU (ASO SA TOE TU)**

SINI: Ia malamalama le vasega e i ai le mana o Iesu na ala ai ona toe tu.

TUSI FAITAU: Mareko 16: 1 – 8.

FESOASOANI MO FAIAOGA:

Tamaiti, o le a foi se mea o faamanatuina i le Aso Sa lenei?. Ioe, o le Aso Sa o le toetu a tamaiti! O le Aso Sa lenei na toetu manumalo mai ai lo tatou Alii faaola o Iesu mai le oti ma le tuugamau. O le faaolataga na ia saunia mo le lalolagi agasala.

Ae fai mai, e toatolu tina ia e taua e Mareko na latou uluai iloaina vavega na tupu. O Maria le Makatala, o Maria le tinā o Iakopo ma Salome na latou molimauina le taeao fou na uluai toetu mai ai Iesu mai le tuugamau ma le oti.

O se vaiga e le masani ai, ae o le faamoemoe tupito lea o le Atua, na ia auina mai ai lona alo pele i le lalolagi. O le taunuuga lea o lana faaolataga na tapena mo le tagata agasala. O le toe soifua manumalo mai le oti ma le tuugamau.

O se feau foi lea mo i tatou le fanau, e leai se mea e faigata i lo tatou Atua. O Iesu o le uo a tamaiti, o le Iesu manumalo auā na ia manumalo i tiga ma puapuaga na ui mai ai ina ia faaolaina i tatou e ala i lona toetu.

GALUEGA FAATINO: **FAATINO LE TALA.**

PESE: A Tumau ia Iesu....

A'OA'OGA:

1. E malosi le mana o Iesu.
2. O Iesu o le uo a tamaiti.
3. Tumau ma talitonu ia Iesu.

UA TOETU IESU



MANATU TAIALA O APERILA:

VALAAUINA E LE ATUA

O le valaaufina ma le fa'aaogaina o lo tatou ola, o se fuafuaga tuutuu mamaao a le Atua i lo tatou faatauvaa. E le gata e iloa ai lana pule aoao i lo tatou ola, ae ina ia faaalia ai foi le silisili ese ma lana faaeaea ia i tatou.

ASO SA: **07 APERILA 2024**

MATAUPU: **O LE VALAAUINA O IEREMIA**

SINI: Ia malamalama tamaiti, o le Atua na valaaufina Ieremia e fai ma perofeta.

TUSI FAITAU: Ieremia 1: 5 – 10

FESOASOANI MO FAIAOGA:

O le valaaufina tamaiti e tutusa ma le upu fa'aaogaina, filifilia ia po o le tofiaina. O se faaupuga e faailoaina mai ia te i tatou, se galuega tāua o lo o mana'o se tagata e tatou te o te faatino. Ia po o se auauanaga e mana'o ai le Atua e tatou te faia.

Faapena le mea lea e tupu i totonu o le tala lea sa tatou faitauina. O le valaaufina po o le fa'aaogaina o Ieremia e le Atua. Fetalai le Atua ia Ieremia, “Na a'u iloa oe a o lei faia oe e a'u i le manava; na a'u faapaiaina oe a o lei fanau mai oe, na a'u tofia oe e fai ma perofeta i nuu.”

A o le valaaufina foi tamaiti fai mai na valaaufina a o lei i ai i le manava o lona tinā. Ua tou vaai la tamaiti i le silisili ese ma le matautia o le valaaufina o Ieremia. E ui lava foi na manatu Ieremia o ia o se tamaitiiti e leiloa foi ona tautala. A o lea ua fa'aali manino i ai e le Atua lona finagalo; “ ‘Aua e te faapea, O a'u o le tama itiiti; auā o i latou uma ou te auina atu i ai oe, e te alu lava i ai, o mea uma foi ou te fai atu ai ia te oe, e te fai atu ai lava. ‘Aua e te fefe ia te i latou, auā ou te ia te oe e laveai ia te oe.’”

Tamaiti na uma loa ona fetalai le Atua i upu na, ona pa'i atu lea o lona aao i le gutu o Ieremia, ma fai atu i ai, “ua ou tuuina atu upu i lou gutu, faauta, ua ou tofia oe i le aso nei e pule i nuu ma malo.”

O le mea lea tamaiti, o so o se valaaufina e tofia ai i tatou e le Atua, ia tatou iloa lelei, e i ai faatasi ma le Atua e laveai i tatou.

Uiga o Upu:

- i) Perofeta - auaua a le Atua / Faifeau
- ii) faapaiaina - faamamaluina
- iii) faauta - faalogo mai

GALUEGA FAATINO: Paso

Saili mai upu o lo o tuuina atu, i totonu o le paso lenei.

I	O	F	G	I	V	T	S
---	---	---	---	---	---	---	---

A	E	A	V	N	O	O	A
T	I	R	U	O	L	F	N
I	U	P	E	S	G	I	M
S	T	I	U	M	N	A	R
U	S	E	R	T	I	U	E
A	O	I	L	I	K	A	I
P	E	R	O	F	E	T	A

1. Ieremia
2. Tofia
3. Usitai
4. Perofeta

PESE:

Pule le Atua i mea uma lava
 O le foafoaga na ia faia
 E oo i valaaauina ma mea uma lava
 O Ia lava na te tofaina.

} x2


Tali: Talitonu faatuatua i le Atua
 O ia o lou tapasa
 Talitonu faatuatua i le Atua
 O ia o lou tapasa.

(Fati: O ba la di).

A'OA'OGA:

1. O valaaauina e mai le Atua
2. 'Aua le fefe e faatino le valaaauina.
3. O le Atua e tautoaluaina lo tatou faatauvaa.

UA VALAAUINA IEREMIA E LE ATUA



Before I formed you
in the womb I knew
you, before you were
born I set you apart;

I appointed you
as a prophet to
the nations.

Jeremiah 1:5 NIV

MATAUPU: NASERI A LE ATUA

SINI: Ia malamalama tamaiti o le Naseri o le tagata ua faapaiaina mo le Atua.

TUSI FAITAU: Faamasino 13: 1 – 5

FESOASOANI MO FAIAOGA:

E i ai se tamaititi e igoa ia Naseri i le tatou Aoga Aso Sa? (ia le na)

O le Naseri tamaiti, o le tagata lea ua vavaeeseina ma faapaiaina mo le Atua ma lona finagalo. Ia e mafai foi ona faapea o le tagata ua fai ma taulaga i le Atua. E le tatau ona inu uaina po o se mea oona. E le mafai foi ona tago pe pa'i i se mea leaga, po o se tagata oti. Aisea? Ona foi o lea ua faapaiaina mo le Atua. O lona uiga, na o mea paia, mama ma le mālie e na te faia e faafafia ai le Atua.

O le tasi tagata o Soraa i le itu aiga o Tanu, o Manoa lona igoa, sa pa lana avā, pe le fanau. Ua fa'aali ia te ia le Agelu a le Alii ma fai atu ia te ia, "o le a to oe, e te fanau mai se tama tane, e le oo se tafi i lona ulu, auā e faia le tama ma naseri i le Atua, e afua mai ina fanau; o ia foi e afua mai ona faaola ia Israaelu ai lima o Filisitia."

O Samasoni la tamaiti lea e autu i ai le tala sa faitauina, o ia lea o le naseri a le Atua. Na filifilia ma fa'aaogaina e le Atua e fai ma laveai ia Israaelu ai lima o Filisitia. Manatua foi la tatou, e 40 tausaga o avea Israaelu ma pologa a Filisitia, ona filifili ai loa lea e le Atua le atalii lea o Manoa e fai ma faaola i lona nuu. A o tuutuuga la ia mo le avea ma naseri, e sa ona oti le lauulu, e sa ona inu i se uaina po o se isi mea oona, e sa foi ona tago pe pa'i i mea lē mama. Ae tau a o mea ua faapaiaina ma mea paia e na te faia.

O le feau foi lea mo tatou tamaiti, e mafai ona avea i taou ma Naseri, pe afai tatou te alolofa ma faamaoni i le Atua. O tatou ua aveeseina e fai le finagalo o le Atua, ia pe faapea foi o tatou o taulaga i le Atua. E tatau ia i tatou ona amio lelei ma fa'aaloalo i le Atua, 'aua tatou te faia faatinoga e le fiafia ai le Atua, auā o tatou ua faapaiaina mo le Atua.

Uiga o Upu:

- i) naseri - vavaeeseina / faapaiaina / taulaga i le Atua.
- ii) uaina - suā vine
- iii) fagafulu tausaga - 40 tausaga
- iv) pa - e lē fanau.

GALUEGA FAATINO: Faatumu Avanoa

Faatumu avanoa i upu nei: auā, afua, fanau, lima, faaola, tama

..... "auā faauta, o le a toe oe, e te fanau foi se tama tane; e le oo se tafi i lona ulu, auā e faia le tama ma naseri i le Atua, e afua mai ina fanau; o ia foi e afua mai ona faaola ia Israaelu ai lima o Filisitia."

PESE: Tama ma Teine, ia lototetele
Ia tumau i le Atua, 'aua le fefe

‘Alo’alo ese mai, i mea vaivai x2
A ia fa’aaogaina pea, mo le matai.
(Fati: E alofa fua ma alofa mutimutivale)

A’OA’OGA:

1. Ia fai i tatou ma Naseri a le Atua
2. Faamaoni i le Atua,
3. Alofa i le Atua.

O LE NASERI A LE ATUA



ASO SA: 21 APERILA 2024

MATAUPU: UA FAI IOSEFA MA LAVEA'I

SINI: Ia malamalama le vasega na lavea'i e Iosefa lona aiga mai le fia aai.

TUSI FAITAU: Kenese 45: 1 – 9

FESOASOANI MO FAIAOGA:

O le lavea'i e tutusa ma le upu faasaoina. A o le tasi nei o mafuaaga na ala ai ona oo Iosefa i Aikupito. E ui e le o se faatinoga lelei na mafua ai ona oo Iosefa i Aikupito, ae manatu tamaiti, o le Atua na fuafuaina ia faatinoga.

O lea ua avea Iosefa ma pule i le nuu o Aikupito. Ua o atu foi ona uso e su'e meaai atu i Aikupito, ma lo latou leiloa, o Iosefa lea ua pule i le nuu. Ua maua lo latou avanoa e feiloai ai ma Iosefa, ao Iosefa ua le mafai e ia ona oono i o latou luma, ona alaga lea o ia, “Ia o ese tagata uma ia te ia”


E leai foi se isi na tu mai ia te ia i le taimi lea. Ona tagi leo tele lea ma ua lagona e le nuu atoa, se ia oo foi le aiga o Farao. Ona fai atu lea o ia, “O a'u o Iosefa lo outou uso, o ola mai pea ea lo'u tama? Na matuai faateia le au uso, a o Iosefa ua fai atu, ‘aua nei tiga pe fai ma mea leaga i o outou manatu, ina ua outou faatau mai ia te a'u i le mea nei; auā na auina mai a'u e le Atua e muamua ia te outou e fai ma faaola; auā o ia tausaga e lua ua i ai le oge i le nuu, o loo totoe foi tausaga e lima e le i ai se galuega i le suasolo po o se seleselegasaito.

“Na auina mai a'u e faasaoina outou i le lalolagi, e faaola foi ia te outou i le faaolataga tele.”

O le faamanatu foi lea mo i tatou le fanau. Ia avea i tatou ma laveai i nai o tatou tei laiti ma so o se isi lava tagata o lo o manaomia la tatou fesoasoani.

Uiga o Upu:

- | | | | |
|------|-----------------|---|------------------------|
| i) | oono | - | onosai |
| ii) | oge | - | leai ni meaai |
| iii) | atatuvala | - | popole |
| iv) | suisolo | - | faamaluina o le eleele |
| v) | seleselegasaito | - | fafai ? ua 'aina |

GALUEGA FAATINO: Faafetaui upu

PESE: O Iosefa, o Iosefa na ia faasaoina
 O lona aiga, o lona aiga fiafia ua lavea'iina

O le Atua, o le Atua, tāpenaina tatou
I lona alofa, i lona alofa, fiafia uma ai tatou

A'OA'OGA:

1. O le Atua e lavea'iina i tatou
2. Ia pei i tatou o Iosefa le loto alofa
3. Alofa i lou aiga

UA FAI IOSEFA MA LAVEA'I I LONA AIGA



ASO SA:

28 APERILA 2024

MATAUPU: O IOANE LE PAPATISO

SINI: Ia malamalama tamaiti o le galuega a Ioane o le papatisoina o tagata i le vai.

TUSI FAITAU: Mataio 3: 1 – 6

FESOASOANI MO FAIAOGA:

O le papatiso po o le papatisoga tamaiti o se tasi nei o vaega tāua i le soifuaga o so o se Kerisiano. I lona faamatalaina o le papatiso poo le papatisoga, o le faailogaina lea o le tagata i totonu o le aiga o Iesu Keriso po o le ekalesia.

O Ioane la, o lona lea valaauna mai le Atua, na te papatisoina tagata o e ua faailogaina o le aiga o Iesu. Sa tala'i o ia i le vao o Iutaia. Ua ia talai foi le latalata mai o le malo o le Atua, ma tau valaaau i tagata ina ia salamo ia mai a latou agasala e faasaoina ai.

A o ia foi lea o lo o fai mai le perofeta o Isaia, “o le leo o le ua alaga i le vao, ina teuteu ia e outou le ala o le Alii, ia faasasao ona ala.

O ona ofu o le fulufulu kamela ma le fusi pa'u i lona sulugatiti, a o ana meaai o le se akerise ma le meli vao ia.

O le faamanatu foi lea mo i tatou le fanau, po o le a lava se galuega ua fa'aaogaina ai e le Atua lo tatou ola, ‘aua nei galo, o le filifiliga na e mai le Atua. Ia tatou faatinoina ma le loto atoa ma le agaga faafetai.

Uiga o Upu:

- | | | | |
|------|----------------|---|----------------------------------|
| i) | perofeta | - | auauna / Faifeau |
| ii) | alaga i le vao | - | lauga i le vao / tala'i i le vao |
| iii) | sulugatiti | - | suluga. |

GALUEGA FAATINO: Sa'o pe SeseTali mai fuaiupu o lo o i lalo i le Sa'o po o le Sese

1. O le salamo le feau o le talaiga a Ioane? (Sao/Sese)
2. O le se akerise ma le meli vao meaai a Ioane? (Sao/Sese)
3. O Ositaulaga na valoia le uiga o le igoa o Ioane? (Sao/Sese)

PESE: Le Atua e, ua valaaau mai
Ioane le papatiso, tulai mai
E talai atu le tala
Ia salamo uma tagata.

O le leo o lē, ua alaga i le vao
Teuteu le ala, ma faasasa'o

Ua latalata mai le iuga
E ao ina faautauta.

Tali: Le Atua faafetai, i lou alofa mai
Le Atua ua faamalo, o lenei ua mafai
Ia viia oe, ua taunu nei le faamoemoe
E silisli ese oe, i o matou nei loto e.

(Fati: Im your angel)

A'OA'OGA:

1. Ia faataua au feau i lou aiga
2. Tatou fesoasoani i isi tagata.
3. Ia mama o tatou loto.

O IOANE LE PAPATISO



MANATU TAIALA O ME: LOTO FESOASOANI

O le loto fesoasoani o le tasi nei o fuafuaga mamana a le Atua i lo tatou ola. Na faia i tatou i lona faatusa paia, ma lona faamoemoe ina ia tatou galulue faatasi ma loto fesoasoani'ai le tasi i le tasi. Le ala foi lea na ia faia ai le fafine i le amataga, e fai ma fesoasoani i le tane.

ASO SA: **05 ME 2024**

MATAUPU: **O LE AGAGA PAIA**

SINI: Ia malamalama le vasega o le Agaga Paia o lo tatou lea fesoasoani sili.

TUSI FAITAU: Galuega 2: 1-4

FESOASOANI MO FAIAOGA:

O le Aso Penetekoso, o le aso lea sa i ai uma lava tagata i le mea e tasi ma le loto gatasi. Na faafuaseia ai ona taalili mai le lagi, ma ua peiseai ai o le matagi ua agi tele mai, ma ua tumu uma ai le fale sa nonofo ai tagata nei. E le gata i ia vaaiga, a ua latou iloaina ai foi o laulaufaiva peiseai o le afi ua vaevaeina, ma ua nofo lea i o latou luga taitoatasi.

Ua faatutumuina foi i latou uma i le Agaga Paia o le Atua, na mafua ai ona mafai ona latou tautatala i gagana eseese. O le Agaga Paia la tamaiti, o le mea alofa lea na aumai e le Atua e fesoasoaniina i tatou i taimi uma o lo tatou ola.

Auā o le mea mautinoa lava ia, po o le a lo tatou vaivai ma lo tatou faatauvaa. Po o le a foi lo tatou fai mai e tatou te lē mafaia ona faia o se mea, ia tatou mautinoa lelei, a i ai le Agaga Paia o le Atua ia i tatou, e tatou te mafaia mea uma lava. O le Agaga Paia na te faamalosia o tatou loto ma o tatou mafaufau.

Uiga o Upu:

- | | | | |
|------|-----------------|---|---|
| i) | taalili | - | lūlū |
| ii) | laulaufaiva afi | - | faailoga e iloa ai le mamalu o le Atua. |
| iii) | faafuasei | - | le'i mafaufauina |
| iv) | Penetekoso | - | 50 Aso talu na toe soifua mai Iesu. |

GALUEGA FAATINO: Faatulagana

Faatulaga upu nei i le faitauga sao. (Ft. soa – aso)

1. lilitaa -
2. fuaseifaa -
3. tagima -
4. faivalaulau -

PESE: 114 Agaga Sa e, afio mai (Pese ma Viiga)

A'OA'OGA:

1. O le Agaga Paia o lo tatou fesoasoani sili.
2. Faatalitali ma le loto talitonu i le Agaga o le Atua.

PENETEKOSO: O LE AFIO IFO O LE AGAGA PAIA



ASO SA: **12 ME 2024 (ASO SA TINĀ)**

MATAUPU: O LE TINĀ LOTOTELE

SINI: Ia malamalama tamaiti a lototele le tina, ua manua se faamoemoe.

TUSI FAITAU: Eseta 4: 15-17

FESOASOANI MO FAIAOGA:

O le lototele e tutusa ma le toa o le loto. E le fefe vale gofie. Po o le a le tele o faafitauli ogaoga e feagai ma i tatou, ae a tatou maua le lototele ma le toa. E faigofie mea uma.

Faapena le mea lea e tupu i le tala sa faitauina. O le tala ia Eseta ma Moretekai faatasi ai ma le aiga o Iuta. O le mea o lo o tupu, ua i ai fuafuaga le talafeagai ua manatu i ai Hamanu le auauna a le tupu, e faia mo Moretekai, ina ia fasiotia ai o ia.

Peitai tamaiti, ese le manaia o le mea na amata ona fai e Eseta e faasaoina ai Moretekai. O le taimi a na iloa ai e Eseta o le oti le taunuuga o Moretekai. Ona ia fai atu lea ia Moretekai, e alu ma faapotopoto sa Iuta uma o i ai i Susana, ma ia anapopogi mo ia. ‘Aua le aai, ‘aua foi le inu i aso e tolu i le po ma le ao; o ia foi ma lana galu teine o le a latou faapea foi ona fai.

O le manao o Eseta ia anapopogi uma sa Iuta faatasi ma ia ina ia maua se tali manua. Faatasi ai ma lana upu ia sa Iuta, afai ou te oti, oti ai pea ia. Ona alu ai lea o Moretekai pei ona fai atu ai Eseta, ma lona loto fiafia tele.

Tamaiti e faapena o tatou tinā, e le malolo le saili o mea tatou te manua ai. A o i tatou, ia tatou alolofa i o tatou tinā, ma ia o tatou tatalo foi i le Atua e faamanuia īā te i latou.

Uiga o Upu:

- | | | | |
|-----|------------|---|-------------------------------------|
| i) | anapopogi | - | fa’aaoge / ‘aua le ‘ai, ‘aua le inu |
| ii) | galu teine | - | faapotopotoga o teine |

GALUEGA FAATINO: Taliga Fesili

1. O ai Moretekai?

Tali: O le sa Iutā.

2. O le a le manao o Eseta?

Tali: Ia anapopogi tagata uma.

PESE: O le tinā e lototele
Na tulai ma le lē fefe
E tautala i le mea moni
Taunuu le olioli
Ua tamoe osooso pei se oti. (Fati: Iesu alofa i tamaiti.)

A’OA’OGA:

1. ‘Aua le fefe e tautala i le mea moni
2. Lototele pei o lou tinā
3. Ia toa le loto i taimi uma

O ESETA LE TINĀ LOTO TELE



MATAUPU: FESOASOANI I SO O SE TAGATA**SINI:** Ia malamalama tamaiti o le loto fesoasoai, o le finagalo lea o le Atua.**TUSI FAITAU:** Luka 10: 29-37**FESOASOANI MO FAIAOGA:**

O ai ma te tuaoi? o le fesili lea a le aoao tulafono ia Iesu. Peitai o lea ua tali e Iesu lenei fesili, i le faamatalaina o le tala i le Samaria agalelei.

Fetalai Iesu, “O le tasi tagata na alu ifo mai Ierusalema i Ieriko, ua maua o ia e tagata fao mea; ua latou toeseina ona ofu, ma fasi ia te ia, ua latou o ua tuua o ia, ua tāli oti.”

Ona alu ane lea o le tasi tagata ositaulaga i lea mea, ua ia iloa atu lenei tagata ua tali oti, ona ui ane lea o ia i le tasi itu ala. Ona sosoo ane ai lea ma le sa Levī ma ua oo ane i le mea o taoto ai o ia, ona matamata lea i ai, ona ui ane lea o ia i le tasi itu ala.

Peitai ua ui ane Samaria ua alu atu o ia ma ua iloa o ia o taoto mai, ona mutimutu vale lea o lona alofa; “ua alu atu ma ua fusifusi ia te ia i ona manua, ua liligi foi i ai le suauu ma le uaina; ua faatietie ia te ia i lana lava manu, ma taitai ia te ia i le fale talimalo, ma tausi ia te ia.”

Ua ia to ae foi tenari e lua, ma tuu atu i le pule o le fale talimalo, ma fai atu ia te ia, ia e tausi ia te ia, ai se mea e te toe faatau atu i ai, ou te taui atu ia te oe pe a ou toe sau.

O le faamanatu foi lea mo outou le fanau. Ia maua le loto fesoasoani i so o se tagata. ‘Aua le alofa faapito tau lava na o latou e te iloa ma e alofa ai. A ia alofa so o se isi.

Uiga o Upu:

- i) tenari - tupe
- ii) toeseina - aveese
- iii) fao mea - gaoi

GALUEGA FAATINO: Paso

S	O	I	G	I	V	F	S
A	A	A	V	N	O	A	A
T	I	M	U	O	F	O	N
I	F	P	A	S	U	M	M
S	A	I	U	R	N	E	R
U	S	E	R	T	I	A	E
T	I	A	O	I	K	A	I
G	E	R	P	F	E	S	A

1. Samaria
2. Fao mea
3. Tuaoi
4. Ofu
5. Fasi

PESE: Amazing Grace

A'OA'OGA:

1. Alofa i so o se tasi
2. 'Aua le alofa faapito
3. Loto fesoasoani.

SAMARIA AGALELEI



MANATU TAIALA O IUNI: TUMAU I LE ATUA

O lē e tumau i le Atua e le taumateina lona manuia. Auā o le Atua lava ia, o le Atua e faamaoni ma alofa mutimutivale mo i tatou. O a foi faafitauli ma fatiatama'i e tutupu i lo tatou ola, e faigofie lava ona tatou manumalo ai, pe afai tatou te tutumau ma le faamaoni i le Atua. ‘Aua foi le avea ia faafitauli ma ala e faavaivaia ai i tatou ma le molimau i le alofa ma le faamaoni o le Atua.

ASO SA: **02 IUNI 2024**

MATAUPU: **O SETEFANO O LE TAGATA LOTOTELE**

SINI: Ia malamalama tamaiti o le tautala i le mea moni, o le mea sili lena.

TUSI FAITAU: Galuega 7: 54 – 60

FESOA SOANI MO FAIAOGA:

O le tala lea sa faitauina tamaiti. O se vaega le na o le lauga a Setefano faatasi ai ma lona oti.

Ina ua uma ona lauga atu Setefano i luma o tagata. Sa matuai le fiafia ma feitai le toatele o tagata. O nisi ua matuā lotoa a o nisi ua lilivau o latou nifo i le fia tagolima ia Setefano. Peitai ua tumu o ia i le Agaga Paia, ua ia pulatoa foi i le lagi, ma ua ia iloa atu le pupula o le Atua ma Iesu o lo o tu i le itu taumatau o le Atua; ona ia fai atu lea, “Faauta, ua ou iloa le lagi ua avanoa, ma le Atalii o le tagaa o lo o tu i le itu taumatau o le Atua.”

Sa lagona e tagata lo latou le fiafia i upu ia na tautala i ai Setefano. O lea na latou alalaga ma pupuni o latou taliga e lē fia faalogo i ana upu. Ua latou feosofi ane foi ua tulei atu ia te ia i tua o le aai, ona latou fetogi lea ia te ia i maa. A o ia (Setefano) ua ia valaau i le Alii, “Le Alii e Iesu, ia e talia mai lo’u nei agaga.” Ua tootuli foi o ia ma alaga leo tele, ua faapea atu, “Le Alii e, ‘aua e te tuuina atu lenei agasala ia te i latou.” ona moe ai lea o ia.

Uiga o Upu:

- i) alaga - valaau leo tele
- ii) matuā lotoa - tiga le loto
- iii) peritomeina - faamamaina
- iv) perofeta - auauna a le Atua / Faifeau
- v) lilivau nifo - ua ū o latou nifo.
- vi) pulatoa - sioa / le emo mata

GALUEGA FAATINO: Tusiga ata

Talosagaina lau susuga le faiaoga, e tāpena e lau susuga ni A4 ma ni peni vali, ona tufa lea i tamaiti e tusi ai ata o lo o faaigoa atu i lalo.

1. Perofeta - _____
2. Maa - _____
3. Taliga - _____

PESE: E alofa fua:

E alofa sua, alofa mutimuti vale
O le Alii i lana fanau x2
E faateletelegese, o lona toasa
Ae faatumauina o lona alofa

A'OA'OGA:

1. ‘Aua le fefe e faailoa le mea moni.
2. E faatasi le Atua ma le tagata puapuagatia
3. E le tuulafoaia i tatou e le Atua.

O SETEFANO LE TAGATA LOTO TELE



ASO SA: 09 IUNI 2024

MATAUPU: TUMAU I LE ATUA, E MANUIA AI

SINI: Ia malamalama tamaiti, o le tagata e tumau i le Atua, e manuia ana taumafaiga.

TUSI FAITAU: Tanielu 6: 1 – 10

FESOASOANI MO FAIAOGA:

O lea ua manatu Tariu le tupu o Peresia ina ia tofia ni alii sili ma ni ali silisili o lona malo. Ua ia manatu foi e sili atu Tanielu i alii sili ma alii silisili ona o lona atamai. O lea na tofia ai Tanielu e pule i le malo uma.

O i la, na manatu ai loa alii sili ma alii silisili ina ia latou saili se mea e ta'u salaina ai Tanielu ma faasalaina ai loa. Peitai, ua fiu i latou e saili se mea leaga e faasalaina ai, a ua leai se mea ona o se tagata e faamaoni tele. O le ala lea na latou manatu ai, ina ia latou faia se tulafono e maua ai o ia.

Ua latou o atu ia Tariu ma talosaga i ai, ina ia faia se tulafono, e tapu ai ona toe faatoga se tasi i se mea mai se tasi atua, po o se tasi tagata, a ia tau lava o Tariu le tupu e faatoga i ai. Ua latou faatu foi se faasalaga mo lea tagata, ina ia lafoina i le lua o Leona pe a le usitaia lea tulafono.

Ina ua iloa e Tanielu lenei tusi, ona alu ai lea o ia i lona fale, ua avanoa foi le faamalama o lona potu e faasaga i Ierusalema, ona ta'i foi faatolu i aso ona tootuli o ia i ona tulivae, ma tatalo, ma faafetai i luma o lona Atua, faapei ona masani ai o ia.

Tamaiti o le feau foi na mo i tatou. Po o le a le tele o faafitaui aemaise o le taumafai o nisi ina ia saili se togafiti tatou te leaga ai. ‘Aua tatou te vaivai ai, a ia tatou tumau pea ma faatuatua i le Atua, e manuia ai mea uma tatou te manatu ai. Vaai foi ia Tanielu, e lei avea tulafono ma taumafaiga lē lelei a alii sili ma alii silisili, ma ala na faavaivaia ai le ola tatalo ma le tapuai i le Atua.

Uiga o Upu:

- | | | | |
|------|------------|---|--------------------------------|
| i) | toaluafulu | - | toa luasefulu |
| ii) | faalani | - | ta'u leagaina ai / pe maua ai |
| iii) | faamauina | - | faatulafonoina / faamausaliina |
| iv) | vavao | - | sa |

GALUEGA FAATINO: Sa'o pe Sese

1. Na faamoemoe Tanielu ia Tariu e laveai ia te ia
Tali: (Sese)

2. O alii sili ma alii silisili na faia tulafono
Tali: (Sa'o)

3. O le ita tele o Tanielu na lafoina ai le lua o Leona
Tali: (Sese)

4. O Tariu na talosaga i alii sili e faasao Tanielu
Tali: (Sese)

5. O le tagata e 'ai meaai le mamā e lafaina i Leona
Tali: (Sese)


PESE: Fiafia lo'u loto tau atu tagata o!
Iesu Keriso le tupu x3
O Ia o le tupu o tupu } x2

Get all exited
Go tell everybody that
Jesus Christ is Kingx3
Jesus Christ is still the King of Kings

A'OA'OGA:

1. Ia tumau i le lototele
2. 'Aua le fefe
3. Faatuatua i le Atua.

O TANIELU LE NA LOTO MAU I LE ATUA



Daniel went into his house
and three times a day he
got down on his knees,
prayed and gave thanks
to his God.

Daniel 6:10
THEWORDFORTHEDAY

ASO SA: **16 IUNI 2024**

MATAUPU: O LE OTI O AIKUPITO

SINI: Ia malamalama tamaiti, e tutupu vavega i le tagata e tumau ma le faatuatua i le Atua.

TUSI FAITAU: Esoto 14: 24 – 28

FESOASOANI MO FAIAOGA:

Ua oo foi i le leoleoga o le taeao, ua silasila ifo le Alii i ‘au a Aikupito nai le afi ma le ao faaniutu, ua ia faaatuatauvaleina ‘au a Aikupito ina ua ia tuueseina o mea e taavalevale ai o latou kariota, ona toso gata ai lea. O nisi ua manatu e toe fia fo’i ona ua latou mautinoa o lo o ‘au le Atua ma Israelu, a o isi o lo o mananao pea e faaaauau le tuliloaina, ma latou oo atu ai i totonu o le sami i le iliti tai matutu.

Ona faaloaloa lea e Mose o lona lima i luga o le sami, ona toe fo’i atu lea o le sami i le vave ao i lona tūga tuai, ma felafoaiina ai Aikupito i totonu o le sami. Ua foi le suasami, ua ufitia ai kariota, ma ‘au na tietie i solofanua, o le itu taua uma a Farao, e na mulimuli atu ia te i latou ai totonu o le sami, e leai se tasi na totoe o i latou.

A o Israelu, ua matatau i latou i le Atua, ua latou faatuatua foi i le Alii, atoa ma lana auauna o Mose.

Uiga o Upu:

- | | | | |
|------|------------------|---|---------------------------|
| i) | iliti tai matutu | - | oneone i totonu o le Sami |
| ii) | faaloaloa | - | faasasao |
| iii) | fetaiaiga | - | fetai’ai / fetaui |

GALUEGA FAATINO: Faatulagaga

Ft. tinofaa – faatino.

- | | | | |
|----|-----------|---|------------------|
| 1. | tumatu | - | <i>matutu</i> |
| 2. | fanuasolo | - | <i>solofanua</i> |
| 3. | otakari | - | <i>kariota</i> |
| 4. | pitoaiku | - | Aikupito |

PESE: O a’u oute aumau i le mea nei
Ma le olaga agasala uma nei
Ae ina ua ou maua Iesu
Ua ou mauaina lona filemu

Tali: E moni e mulimuli
Mai ia te au
Le agalelei ma le alofa
I aso uma o lou ola
E moni e mulimuli
Mai ia te au
Le agalelei ma le alofa

I aso uma o lou ola
Ae ou te nofo i le fale o le Alii e faavavaau
Ma te talisua foi o ia ma au
E moni e mulimuli mai ia te au
Ia aso uma, i aso uma o lo'u ola.

A'OA'OGA:

1. 'Aua le fia malosi
2. Alofa i so o se tagata
3. 'Aua le taui ma sui.

UA OTI FARAO MA ANA AU I TOTONU O LE SAMI ULAULA



ASO SA: 23 IUNI 2024

MATAUPU: UA LILIUINA SAULO E LE ALII

SINI: Ia malamalama le vasega, o le pupula o le Alii na suia ai Saulo.

TUSI FAITAU: Galuega 9: 3 – 6

FESOASOANI MO FAIAOGA:

Tamaiti, o le tatou mataupu o lenei taeao. “O le liliuina o Saulo e le Alii.” E mafai foi ona sui le upu liliuina i nisi upu e tutusa uiga ma le liliuina. E i ai la se tama po o se teine na te iloa nisi upu e tutusa uiga ma le upu liliuina. Ia lelei. O le upu “suia” e mafai foi ona tuu i ai le upu “faafouina”. Ona faitauina lea faapea o le tatou mataupu. Ua suia Saulo e le Alii” pe faapea foi “Ua faafouina Saulo e le Alii.”

Tamaiti, o ai nisi na faalogo muamua i le tala lea e uiga ia Saulo. Ioe, o le tala lena lea sa tatou faitauina mai le Tusi Paia. O Saulo, o se tagata sa faasaua i le Ekalesia a Iesu Keriso. A tau le faasaua, o lona uiga o le ita ma le fiafia i le Ekalesia a Iesu Keriso i le lalolagi. E musu tele e faalogo o tautau e tagata le suafa o Iesu, ma e iu ai lava ina fasi tagata ma saisai ma tuu i le fale puipui.

O le isi la lea ana malaga na alu ai i le aai o Tamaseko e saisai ma fasioti i tagata Kerisiano po o i latou na talitonu ia Iesu Keriso. Fai mai le tala ina ua latalata atu Saulo i Tamaseko, ona faafuasei mai ai lea ona pupula faataliolio mai ia te ia o le malamalama mai le lagi. Ona pau lea o Saulo i lalo i le eleele na ia faalogo atu foi i le siufogga po o le leo, o lo o faapea mai ia te ia. “Saulo, Saulo e, se a le mea ua e sauva mai ai ia te a’u? Ona tali mai lea o Saulo; Le Alii o ai ea oe?, Ona fetalai mai lea o le Alii, “O A’u o Iesu ua e sauva mai i ai, o le mea faigata ia te oe ona aa i tui.” Ona gatete lea o Saulo ma ua faapea atu, Le Alii e, se a le mea e te finagalo i ai ou te faia. Ona fetalai atu lea o le Alii ia te ia, “Tu ia oe i luga, ina alu i le aai ona tauina atu lea ia te oe le mea e tusa ona e faia.”

Fai mai le tala, ua tutu uma tagata na latou malaga faatasi, ua leai se tasi e tautala na o latou faalogo foi i le siufogga ae leai se tasi na latou iloa atu. A ua tu i luga Saulo nai le eleele, ua pupula ona mata, a ua le iloa se tasi, ona latou taitai lea ia te ia i Tamaseko. Ia tamaiti o le tatou mataupu lena i lenei Aso Sa. “Ua liliuina Saulo e le Alii” Ioe, o Saulo o le tagata sauva ma ita i le Ekalesia a Iesu Keriso, ae ina ua taia e le pupula o le malamalamao le Alii na suia ai loa e Iesu e avea ma tagata fou ma le fiafia e talai le tala ia Iesu Keriso.

Uiga o Upu:

- i) pupula faataliolio - pupula mai pei se lio, pupula faalapotopoto
- ii) siufogga - o le fa’aloalo o le pu “leo”
- iii) aa i tui - o le aa o mea ma’ai (o lo o faatusa i ai le sauva ia Iesu Keriso)

GALUEGA FAATINO: Taliga Fesili, fa’aaoga le “Sa’o” po o le “Sese”

1. O Saulo le tupu o Israuelu lea na liliu e le Alii.

Tali: Sese

2. Na alu Saulo i Tamaseko e faafiafia ai.

Tali: Sese

3. O le pupula o le malamalama o le Alii na taia ai Saulo.
Tali: Sa'o

4. O Saulo lea na fai ma Aposetolo a le Alii.
Tali: Sa'o

5. Na taia loa Saulo i le malamalama. Ona fai atu lea "Le Alii e, o a'u ea se tagata leaga?
Tali: Sese

PESE:


1. O Saulo le tagata sa sau
Ia Iesu o le Mesia
Ua matala nei ona noataga
Ae ulufale o Keriso i lona ola
2. Ua faia o ia e le pupula
O le malamalama lea o le Atua
Na suia ai loa lona olaga
Ma avea ai ma ana auauna.
3. Tatou patipati loa ma fiafia
I le alofa o Iesu ua fa'aalia
Mo i tatou o tagata agasala
Ua tatou i ai i lana faaolataga

(fati: E alofa Iesu ia te au, ma mea matagofie ua ia faia"

A'OA'OGA:

1. E mana'o Iesu ia fai i tatou ma tamaiti amio lelei.
2. E fa'aaoga e le Atua lo tatou faatauvaa e tala'i ai lona finagalo.
3. E alofa Iesu i so o se tasi.

UA LILIUINA SAULO I LE MALAMALAMA O LE ALII



MATAUPU: UA TUMAU LE LOTO O IOPU I LE ATUA

SINI: Ia malamalama le vasega, e lei maluelue le loto o Iopu i le Atua ina ua maua i le mai leaga.

TUSI FAITAU: Iopu 2: 6 – 10

FESOASOANI MO FAIAOGA:

Talofa tamaiti, o a mai outou i lenei taeao? Faafetai i le alofa o le Atua o loo manuia uma i tatou. A o le tatou mataupu i lenei taeao; “Ua tumau le loto o Iopu i le Atua.” O ai foi Iopu? Ioe, Iopu lea na maua i le mai papala. O Iopu tamaiti, o loo faamatalaina o le tagata na sao lana amio, e amiontonu, sa ia aloalo ese i mea leaga ma, o se tagata sa matau i le Atua.

Ina ua oo i se tasi aso, ua uma ona feiloai o le Atua ma Satani, ona fetalai ai lea o le Atua ia Satani; Faauta, o ia o i lou lima, tau o lona ola e te faasooina. Fai mai ua alu ese Satani ma luma o le Atua, ona ia faaoo loa lea ia Iopu o le mai papala leaga; e amata mai lava i ona alofivae seia oo i lona tumua’i. A ua atili ai ina ua tago atu Iopu i le ta’egaipu omea ua valu ai lona papala. Talofa ia Iopu, e ese le matautia o lenei ituiga ma’i ua maua ai, ae ua leai foi se tasi e fesoasoani ia te ia. Na manatu lava Satani o le a faifai ai Iopu i le Atua, ae leai, e oo foi i upu faatiga a lona toalua na fai atu ia Iopu, ina ia lafoai ma faifai i le Atua. E lei vaivai ai le loto o Iopu. Na iloa i ana upu, Ua e tautala mai, e pei ona tautala mai o se tasi o le vao fafine valea; ua tatou talia mea lelei mai le Atua, a e tatou te le talia ea ma mea leaga?

Tamaiti, o mea leaga e pei ona tautala i ai Iopu, o tiga ma faigata o le ola e oo mai ia te i tatou. Ia tatou onosai ma talia, aua o mea ia e sue mai ai e le Atua pe o moni lo tatou faatuatua. Pe o tumau pea o tatou loto ia te ia, pe tatou te faavaivai ma faifai ia te Ia. A ua aoao mai lenei tala, ua tumau pea o tatou loto i le Atua, tusa lava po o a tiga ma faigata e oo mai ia te i tatou.

Uiga Upu:

- | | | |
|------------------------|---|--|
| i) ta’egaipu omea | - | o le fasi ipu o le ipu mata’eta’e ua ta’ |
| ii) vao fafine | - | fafine e toatele |
| iii) faifai | - | tauemu, fulitua, fai upu leaga. |
| iv) mea leaga | - | faigata ma tiga o le ola, faafitauli. |

GALUEGA FAATINO: Taliga fesili.

Tali mai i fesili nei i le tala sa faamatalaina.

1. O le a le fetalaina a le Atua ia Satani o loo i le fuaiupu e 6?

Tali: Faauta, o ia o i lou lima, tau o lona ola e te faasooina.

2. O le a le ma’i o Iopu?

Tali: O le ma’i papala.

3. Na faamalosi le toalua o Iopu ia te ia?

Tali: Leai, na fai ia Iopu ina ia faifai o ia i le Atua, ma oti ai.

4. O le a le tali a Iopu na fai i lona toalua?

Tali: Ua e tautala mai, e pei ona tautala mai o se tasi o le vaofafine valea; ua tatou talia mea lelei mai le Atua, a e tatou te le talia ea ma mea leaga.

PESE: A tumau ia Iesu, tatou te filemu.

A'OA'OGA:

1. Ia tumau i le Atua
2. Ia onosai i mea e tiga ai
3. E suesueina e le Atua lo tatou ola faatuatua.

O IOPU MA LONA TOALUA



MANATU TAIALA O IULAI: E SILAFIA E LE ATUA MEA UMA

O le tasi lenei o natura po o uiga matautia ma le Silisili Ese o le Atua. “O LE ATUA NA TE SILAFIA MEA UMA.” O lona uiga, e silafia e le Atua mea uma tatou te faia, e oo lava i o tatou loto. Afai o le Atua lea o lo o tatou talitonu ma faatuatua i ai, e tatau ona tatou ola ma le faaeteete, i le ava ma le matata’u i le Atua. Auā e alofa mai ma faamanuia mai le Atua ia i tatou, pe a o tatou faia mea uma e tusa o le finagalo.

ASO SA: **07 IULAI 2024**

MATAUPU: **AUA LE OLA TUSITUSILIMA**

SINI: Ia malamalama le vasega, o le ola tusitusilima e le fealofani ai le fanau a le Atua.

TUSI FAITAU: Mataio 7: 1 – 5

FESOASOANI MO FAIAOGA:

O le tatou mataupu tamaiti o lenei Aso Sa o le – ‘Aua le ola tusitusilima. E i ai la nisi o le tatou vasega latou te iloa o le a le uiga o lea mea o le tusitusilima? Ia lelei, tago e tusi lou lima i le tasi tama po o se se tasi teine o le tatou vasega, a uma ona tusi lena tama, po o le isi teine foi toe tusi foi lea i le isi tamaitiiti. A uma lena ona tusitisi solo lava lea o lou lima i isi tamaiti.

Ia, o le uiga faigofie lena o le tusitusilima a tamaiti. O le tusitisi solo o lou lima i isi tamaiti po o isi foi tagata. Peitai la tamaiti, e i ai upu e mafai ona faaleoina ai pe faagagaina ai le tusitusilima, ma avea ai o se mea leaga. E pei la o le manatu faapito, taufaaleaga, faamaualuga, pepelo, o le tuuaifuaina, ma isi lava upu uiga leaga faapena.

O le mea tonu lava lea, ua fai mai ai le tatou mataupu. E ‘aua le tusitusilima. Auā e le o se mea lelei le tusitusilima. E tutusa foi le tusitusilima ma le faamasino atu i isi tagata. Tamaiti, o isi ia o upu o le lauga a Iesu i luga o le mauga, lea sa tatou faitauina i le Mataio 7: 1 – 5.




O lo o a’oa’o mai ai Iesu i tagata ia tuu lea uiga o le fefaamasino atu, po o le faamasino fua e le isi tagata o le isi tagata po o le tusitusilima foi. A faafaigofie upu a Iesu, tusa o lo o faapea mai, ‘Aua e te faamasino atu fua i le isi tagata, ae muamua ona faamasino ifo lava oe ia te oe. O lona uiga ‘aua e te fai atu i le isi tamaitiiti e leaga, ae mafaufau ifo lava oe ia te oe, po o oe o se tamaitiiti lelei, pe leaga, po o le aua le fai atu fua i le isi tamaitiiti e sese ia, ae tatau ona e lagonaina muamua e oe, ou foi sese e tele. Ia tamaiti, o le uiga tonu lena o le tatou mataupu – ‘Aua le ola tusitusilima. Tusa ai o le a’oa’oga a Iesu, ina ia ‘aua tatou te fai atu i isi tamaiti, e ese lou pepelo ma lou lē usitai i ou matua; ae sili atu foi lou pepelo ma lou lē usitai. Ia o le tatou mataupu lena i lenei foi Aso Sa. ‘Aua tatou te tu’ua’i i isi tamaiti le leaga ae fesoasoani i ai ma fai i ai e ‘aua le faia ni mea leaga ma mea sese. Aua a fesoasoani le tasi tamaitiiti i le isi tamaitiiti ona maua ai lea e outou, o le fealofani ma fafia faatasi, ae a outou tusitusilima loa, ia o lona uiga o le a tou femisaai ma le fafia le isi i le tasi. O lona uiga tamaiti, o le finagalo moni lava lea o le tatou uo o Iesu mo tatou uma, e pei ona fai mai ai le tatou mataupu: **AUA LE OLA TUSITUSILIMA**. Manuia tele outou le fanau.

Uiga o Upu:

- i) faamasino - su'esu'e/sailiili
- ii) faafiaamitonu - foliga e amitonu ae leai
- iii) fuaina atu/fuaina mai - o le mea e te fai atu i le isi tagata, e toe fai mai e le isi tagata ia te oe.
- iv)\ utupoto - ogalaau

GALUEGA FAATINO: Faafetaui upu i o latou uiga sa'o

Faasino le uiga sa'o o upu:

- | | | |
|----------------|---|---------------------------------------|
| 1. euese |  | o se suesuega po o se sailiiliga |
| 2. mua'i |  | o se mea e te fai atu i se isi tagata |
| 3. fuaina atu |  | tago lou lima e aveese |
| 4. fuaina mai |  | muamua |
| 5. faamasinoga |  | o se mea e fai mai e se isi ia te oe. |

PESE:

1. O Iesu ua a'oa'o mai
Ia tatou faaiuga fai
'Aua nei tatou faamasino atu
Ina nei faamasino mai
2. E leaga le tusitusilima
Aua o oe lava ua e faaleagaina
Ina ua e tuua'i i o
Le mea leaga e i lou loto
3. Tatou o loa ia Iesu
O Ia e maua ai o le filemu
Mo tatou i le lalolagi
Ina ia tatou fealofani
(fati: Jesus is a winner man)

A'OA'OGA:

1. E leai se fealofani pe a ola tusitusilima
2. 'Aua le tu'ua'i le leaga i isi
3. E le finagalo Iesu i le fefaaamasino a'i.

AUA LE OLA TUSITUSI LIMA



MATAUPU: UA A'OA'O IESU I LE TATALO

SINI: Ia malamalama le vasega, o le tatalo tatou te fesootai ai ma le Atua.

TUSI FAITAU: Mataio 6: 9 – 13

FESOASOANI MO FAIAOGA:

Tamaiti, o le Tusi Faitau lea sa tatou faitau ai, mai le Mataupu 6: 9 – 13. O le a le mea e faatatau i ai ia upu. Ioe, sa'o lelei outou. O le tatalo a le Alii ia, po o le tatalo lea sa a'oa'oina e Iesu i ona so'o, a ea tamaiti.

O le tatou mataupu foi la lea o lenei Aso Sa. A o le fesili la mo tatou, O le a le aoga o le tatalo ia i tatou? E mafai la ona tali mai se tama po o se teine i le tatou fesili lea. O le tatalo, tatou te fesootai ai i le Atua ma tau atu i ai mea tatou te mananao ai. Faapei la o le tatalo faafetai, tatalo faatoesega ma ta'u atu o tatou manaoga. E faafetaia le Atua ona o lana ausiga alofa ia i tatou.

Tatou te faafetai i le Atua ona o meaai ua Ia foai mai tatou te aai ai, ina ia maua ai lo tatou malosi. E faafetai foi i le Atua, ona o tatou matua, o tamā ma tinā, i le la'ua tausiga o tatou, a tamaiti? Aua na tausi mai lava tatou e tatou matua o tatou laiti lava (pepe) se'i o'o mai lava i nei taimi ua i ai, o matua o lo o tausia i tatou, e fafaga ma faalavalava ma leoleo foi tatou, ma ave foi tatou i le aoga.

Tamaiti, tatou te tatalo foi i le Atua ma ta'uta'u atu a tatou agasala, o mea leaga ma mea sese ua tatou faia, e pei o le tatou lē usitai i matua, o le lē fiafia e o i lotu, o le fai le tala sese ma le tele ava o isi mea, tatou te iloa e le fiafia i ai le Atua. Tatou te tatalo ai i le Atua, ina ia faamagalo mai i o tatou leaga ma mea sese ua tatou faia.

Tatou te tatalo foi i le Atua e ta'u atu i ai o tatou mana'o. Tatou te mananao ia tatou popoto ma atamamai, tatou te fia maua le malosi ma ola maloloina. Tatou te tatalo foi ina ia faaumi lo tatou ola, tatou te fiafia ai ma matua ma aiga ma uo ma isi.

Ae tou te iloa la tamaiti a tatou tatalo i le Atua, e pei ona a'oa'o mai Iesu, e tatau ona o faatasi ma lo tatou faamaoni, e pei lea o le tatalo ina ia foa'i mai le poto, ia ō faatasi ma lou faamaoni e fai au meaaoga ma faalogo i faiaoga, ona e maua lea o le poto. A'e fia maua le ola umi, ia tatalo ma ia tatou usitai ma ava i matua.

Po o le tatalo foi ia foai mai le malosi ma ola maloloina. E o faatasi lau tatalo lea ma lou toaga e fai galuega e faamalosi ai lou tino, ma taumafai e 'ai i meaai e maua ai le ola maloloina e pei o fualau aina ma fualau fai sua. Ae 'aua le fiafia e ai lolae ma mea suamalie auā tou te mama'i ai.

Ua tou iloa le aoga tele ma le taua o le tatalo mo i tatou. Ia a o le faataitaiga la lena o le tatalo e pei ona a'oa'o mai ai e Iesu mo i tatou. Ia tamaiti sei fai faatasi mai la le tatalo a le Alii. Lo matou Tama e

Ia o le tatou mataupu foi lena o lenei Aso Sa.

Uiga o Upu:

- | | | | |
|------|------------------|---|--------------------------|
| i) | Tama o i le lagi | - | Atua |
| ii) | Paia | - | mamalu |
| iii) | Suafa | - | fa'aaloalo o le upu igoa |
| iv) | lavea'i | - | puipui, faaola |

GALUEGA FAATINO: Faatino le faiga o le tatalo.

1. Fai mai sau tatalo puupuu mo meaai
2. Sau tatalo puupuu pe a e moe.
3. Tatalo puupuu pe a e ala mai i le taeao.

PESE:

Fai sau tatalo i le taeao
Fai sau tatalo i le ao
Fai sau tatalo i le po
E faafafia ai lou loto

A'OA'OGA:

1. E tali le Atua ia tatou tatalo.
2. Ia fiafia tatou e tatalo.
3. O le tatalo e fesootai ai ma le Atua.

O LE TAGATA O LO O TATALO



ASO SA: 21 IULAI 2024

MATAUPU: O LE MALAIA NA OO IA KIASI

SINI: Ia malamalama le vasega, i le leaga o le mana'o fua o Kiasi i mea a isi, na lepela **ai o ia.**

TUSI FAITAU: 2 Tupu 5: 25 – 27

FESOASOANI MO FAIAOGA:

O le tatou mataupu tamaiti i lenei Aso Sa, e pei ona tatou faitau i ai mai le Tusi Paia, O le malaia na oo ia Kiasi.

E i ai nisi upu e mafai ona sui ai le upu lea “malaia”, ae ia tutusa a le uiga ma le tatou mataupu. Ia lelei. E mafai ona suia i le upu ‘mala’ ia ae mafai foi ona tu'u i ai le upu lea ‘faasalaga’. Ona mafai lea ona faitauina faapea, o le mala na oo ia Kiasi po o le faasalaga na oo ia Kiasi a tamaiti. Ae i ai se tama po o se teine na faalogo muamua i le igoa lea o Kiasi; o ai lea tagata e igoa ia Kiasi? O Kiasi o le auauna lea a le perofeta o Elisaia.

O le tatou mataupu la tamaiti e faatatau i le tagata lea e igoa ia Kiasi. O le auauna a le tagata o le Atua po o le perofeta o Elisaia ma lana mea na fai, na mafua ai ona oo le mala ia te ia. O outou manatua le tatou mataupu i le isi Aso Sa e le'i mamao atu, e faapea “Ua faamaloloina Naamanu le Suria. Fai mai, ina ua tea ma mama le ma'i lepela o Naamanu, ina ua taele faafitū i le vaitafe o Ioritana e tusa ma le faatonuga a Elisaia le perofeta. Ona toe foi loa lea o Naamanu ma lana au malaga e faafetai ia Elisaia ma ave i ai ni meaalofa mo ia. Peitai, e le'i talia e le perofeta ni mea alofa. Ona toe fai loa lea o Naamanu ma lana aumalaga e o atu ai i lo latou nuu. A o Kiasi le auauna a Elisaia na vaai ma iloa le tele o oloa na avatu e Naamanu, a ua le talia e Elisaia. Ona oso ai lea o lona mana'o i oloa a Naamanu, ma ia tuliloa ia te ia. Ua iloa mai e Naamanu o lo o tamo'e atu le tagata. Ona ia alu ane lea i lona nofoa faataavalevare e faafetaia'i ia te ia. Na ia fesili po o fea a alu i ai? Ona fai mai lea o ia. Ua auina mai a'u e lou matai, ina ia avatu ni taleni ario se tasi (1) ma ni ofu se lua, mo taulealea e toalua, o so o se perofeta na o mai i mauga o Efaraima. A ua fai atu Naamanu, e ave taleni ario e lua ma ofu e lua, ma la o ma ana auauna e toalua e momoli ia te ia. Ua oo i le fale, ona toe foi ai lea o auauna a Naamanu.

A ua ulufale atu Kiasi ma tu i luma o lona alii. Ona fai mai lea o Elisaia, ia te ia, na e alu ea i se mea? A ua fai atu o ia, E leai ou te lei alu lava i se mea. Ona fai atu lea o Elisaia, lua te lei o ea ma lou loto, ina ua toe foi mai le tagata i lana nofoa faataavalevare, e faafetaia'i ia te oe, ma e aumai taleni ario e lua (2) ma ofu e lua (2). O le mea lea o le a pipii atu ai ia te oe ma au fanau i le lepela o Naamanu i au tupulaga.

Ona alu ese ai lea o ia i ona luma, ua lepela pei o le kiona. Ia tamaiti, o le tatou tala lena. Faalogo la outou i le leaga o le manao fua i mea a isi, ia aemaise ai o le pepelo na ia fai ia Naamanu na ala ai ona ave i ai e Naamanu taleni ario ma ofu. Ae a le pepelo ia Elisaia ina ua fesili atu Elisaia ae fai mai e lei alu lava i se mea. E le fifia le Atua i ni tagata faapea, a ea tamaiti. Aua na o le malaia lava e oo i ai. Lea e pei ona maua ai i le ma'i lepela.

Ia faapena foi la tatou tamaiti. ‘Aua tatou te mananao fua i mea a isi tamaiti, ma ‘aua tatou te faia tala pepelo, e mailei mai ai ma ni mea a isi tamaiti. Auā e le fifia Iesu ia i tatou pe a o tatou ola mananao ma fai tala pepelo. Ia manuia outou le fanau.

Uiga o Upu:

- | | | | |
|------|----------------------|---|---|
| i) | nofoa faataavalevale | - | nofoa e fai pau, e pei o nofoa ia e o ai tagata pipili ma leaga vae
ao nofoa faataavalevale ia e taua i le tala e toso e solofanua |
| ii) | faafetaia'i | - | faa-fetaui, faa-feiloai |
| iii) | toolive | - | toga olive, faatoaga olive |
| iv) | tovine | - | faatoaga vine |

GALUEGA FAATINO: Taliga Fesili

1. O ai Kiasi?

Tali: O le auauna a le Perofeta

2. Aisea na tuliloa ai e Kiasi Naamanu ma lana au malaga?

Tali: O le mana oi oloa a Naamanu.

3. O le a le pepelo a Kiasi na fai ia Naamanu ina ua fesili Naamanu po o fea e alu i ai?

Tali: Ua auina mai au e Elisaia, e ave atu se taleni ario se tasi ma ni ofu se lua so'o o Perofeta.

4. O le a le mala na oo ia Kiasi?

Tali: O le lepela o Naamanu.

PESE:

O Kiasi o ia le auauna
A le perofeta o Elisaia
Ua manao tele i oloa
A Naamanu le toa o Suria

Ua alu atu e tuliloa
O Naamanu ma ana auauna
Ua ia mana oi ni oloa mo ia
A ua pepelo ma ta'u ai Elisaia


Ua tiga tele le perofeta
Ina ua toe pepelo foi i ona luma
Fai atu loa, o le lepela lena
Ia pipii ia te oe ma lou aigā.

(fati: Sa tatalo le teine o Hana)

A'OA'OGA:

1. 'Aua e te manao fua i mea a le lua te tuaoi.
2. 'Aua e te molimau pepelo i le lua te tuaoi.
3. Ia faamaoni i o tatou tiute.

O LE LEAGA NA OO IA KIASI



ASO SA: 28 IULAI 2024

MATAUPU: O LE MANUIA O FANAU

SINI: Ia a'oa'oina le fanau, e manuia i latou pe a faalogo ma usitai i matua.

TUSI FAITAU: Efeso 6: 1 – 3

FESOASOANI MO FAIAOGA:

Talofa tamaiti. Ia o le tatou mataupu o lenei Aso Sa – Fai faatasi mai, O le manuia o fanau. Sei fai faatasi mai le tulafono e lima (5). Ia lelei tele o lana e maua uma lava e outou le tulafono e lima (5) sei tali mai la se tama po o se teine i le fresili lea. O le a se manuia o fanau o lo o ta'u mai i le tulafono lea. Ioe, e faalevalevaina ai ou aso e foa'iina mai e lou Atua ia te oe. A o le a la se mea o lo o tau mai e le tulafono e mafua ai ona maua e fanau lenei manuia (o le faaopoopoina o aso o lo latou ola) Ioe, e lelei tele. O lena o le ava i matua, po o le ava i le tamā ma le tinā, a tamaiti.

Ia tamaiti faalogo lelei mai lava, o lea o le a faamalamalama atu ia te outou le taua o upu ia sa tatou faitau i ai mai le Tusi ia Efeso mataupu e ono (6) a o le fuaiupu muamua (1) e oo i le tolu (3).

Fai mai le fuaiupu muamua; “O outou le fanau, ia outou faalogo i o outou matua i le Alii, o le mea tonu lava lea.” O le uiga faigofie o lenei fuaiupu, o le tau mai lea ia te outou le fanau, o le mea tonu a lea ma le taua e tatau ona outou faia, o le faalogo ma usitai i o outou matua i a'oa'oga ma faatonuga mai le Atua.

O le fuaiupu e lua (2) ma le tolu (3) e pei o le toe faamanatu ma faalauaiteleina mai lea o le tulafono e lima (5).

Fuaiupu e lua (2) fai mai; Ia e ava i lou tamā ma lou tinā (o le uluai tulafono lea ua i ai le mea ua folafolaina) O lona uiga o le tulafono lea e lima, o lo o i ai le mea lea o lo o folafola mai e maua e outou, pe afai tou te faia. O le a lea mea? O le a faateleina ai tausaga tou te ola ai. E mafai foi ona faapea, o se taui po o se faamanuiaga lea mo outou, o le a tele aso tou te ola ai i lenei lalolagi.

Ia lea la e pei ona sosoo mai ai i le fuaiupu e tolu (3); e pei o lona faalauteleina lena o le mea ua folafolaina e pei ona taua i luga.

Tamaiti o le uiga atoatoa lena o le tatou mataupu o lenei Aso Sa. Ia outou iloa lelei o manuia uma tou te maua e mafua o le ava ma usitai i matua, o le faalogo lava lea ma faia a'oa'oga ma apoapoaiga mai le Atua e ala mai i o outou matua, ia aemaise foi o o outou faifeau ma faiaoga. Manuia tele ouotu le fanau ma ia faamalolosi i aoga i lenei foi vaiaso ua amatalia.

Uiga o Upu:

- | | | | |
|------|-------------|---|---|
| i) | ava | - | faalogo ma usitai, fa'aaloalo |
| ii) | ulua'i | - | muamua |
| iii) | tulafono | - | o se faatonuga e puipuia mai ai i le faia o se mea sese |
| iv) | folafolaina | - | o se mea o lo'o faailoa mai e maua e se tasi/ta'uta'u atu |
| v) | tulu'i | - | faaopoopoina, faaumiumi |

GALUEGA FAATINO:

Faatumu avanoa i upu ia: luga, tulu'i laueelele, tina, ava, manuia, nofo, tamā.

Ia e _____ i lou _____ ma lou _____, ina ia _____ ai oe, ma _____
_____ ai i _____ o le _____.

PESE:

Faalogo ma usitai ia tamā ma tinā
E manuia ai lou olaga
E faaumi ai aso o lou ola
Ua sii lena i lo mea uma.

Tamaiti ia vivii atu i le Atua
Ina ua Ia folafolaina
Le manuia mo tatou uma
Pe a tatou ava i matua.

(fati: Faalogo ma usitai)

A'OA'OGA:

1. O le ava i matua e manuia ai fanau
2. E taua le faalogo i le apoapoaiga ma a'oa'oga mai le afioga a le Atua.

O LE AIGA: MATUA MA FANAU



MANATU TAIALA O AOKUSO: O LE ATUA LE TAIALA MO AIGA

O se tasi lea o faamoemoe taua mo so o se aiga. Ia avea pea le Atua ma o latou Taiala. Auā ua tatou talitonu i Lona alofa tausi mai, o lona faamaoni na te laveai ma leoleo mai i tatou i le tele o faigata ma puapuaga e oo mai i o tatou aiga. Ia avea nei le Atua mo tatou taitai i aso uma e manuia ai o tatou olaga.

ASO SA: **04 AOKUSO 2024**

MATAUPU: **O LE AUAIGA O IESU**

SINI: Ia malamalama le vasega, o le aiga moni o Iesu, o i latou e faia le finagalo o le Atua.

TUSI FAITAU: Mareko 3: 31 – 35

FESOASOANI MO FAIAOGA:

Tamaiti, sei tau mai tagata e aofia pe i totonu o tatou aiga? Ioe, o tamā ma tinā, o uso, o tuagane ma tuafafine, e i ai foi ma uso ma tuafafine o tatou tamā ma tinā ma latou fanau, po o i latou ia tatou te tauina faaperetania, o uncles, aunties ia tatou cousins. O tagata uma lava ia e i totonu o lio o tatou aiga a tamaiti?

Ia e faapena foi ia Iesu ia, e i ai lona tamā ma lona tinā ma ona uso ma tuafafine. O ni mafutaga fiafia ma le manaia pe a nonofo faatasi i tatou ma ola faatasi i totonu o aiga. E alolofa tamā ma tinā, uso ma tuafafine ia i tatou le fanau, e faapena foi le fanau i o tatou matua ma tagata uma o o tatou aiga. Afai la e o tatou i se mea, ae leiloa e tamā ma tinā le mea tatou te o i ai, ma umi se taimi e lei vaai matua ia i tatou. Ona o loa lea e sue tatou po o fea o tatou i ai. O le alofa o tamā ma tinā, ia i tatou ina nei te'i ua fasia i tatou e nisi tagata, ia pe tatou te lavevea foi faalavelave ae le iloa atu tatou a tamaiti.

Sa faapea foi le alofa o le tina o Iesu, ma uso o Iesu. Ai ua umi ona le vaaia Iesu i totonu o le latou aiga, o lea na manatu ai loa lona tinā ma ona uso, sei o e saili po o fea se mea o i ai o ia. E oo atu o lo o tumutumu mai tagaa i totonu o le fale, a o lo o i ai ma Iesu i totonu o lena tumutumu o tagata. Ona latou tutu lea i fafo ma feau atu ia te Ia ma valaau atu i ai. A ua le mafai ona o le toatele o tagata na vagavagai o Ia.

A ua iloa atu i latou e le motu o tagata, ona latou fai atu lea ia Iesu. “Faauta, o lou tinā ma ou uso o lo o i fafo, o lo o saili ia te oe” Ona tali atu lea o Iesu i latou, “O ai ea lou tinā? O ai foi o'u suo? Ona silasila solo lea o Iesu i e o nonofo vagavagai ia te ia, ma ua faapea atu, “Faauta, i lou tinā ma ou uso.” Auā o le faia le finagalo o le Atua, o lo'u uso lea ma lo'u tuaffine ma lo'u tinā.

Ioe tamaiti o lea ua fetalai sao lava Iesui le motu o tagata e toatele o tagata uma o lona aiga, o i latou ia latou te faia le finagalo o le Atua. Ae le faapea foi la ua faaleaga e Iesu lona aiga na soifua mai ai i lenei lalolagi, a o se faamanatu foi mo latou ia ola tagata uma e faia le finagalo o le Atua. O le folafolaga mulimuli foi lea a Iesu a o le'i afio i le lagi mo lona auaiga uma i le lalolagi. Ia tatou fealofani. O le finagalo lea o leAtua. O le tatou tala lena tamaiti lenei taeao. Ia manuia foi le alo atu mo aoga i lenei vaisou fou ua amata.

Uiga o Upu:

- | | | | |
|-----|----------------|---|-------------------------------|
| i) | nofo vagavagai | - | nonofo faafesagai ma si'osi'o |
| ii) | silasila | - | vaavaai, tilotilo |

GALUEGA FAATINO:

Faafetaui upu Peretania i upu faa-Samoa

- | | | |
|----|-------------|--------------------------------------|
| 1. | mother | uso o lou tinā, tuafafine o lou tamā |
| 2. | uncle | tinā o lou tamā/tinā o lou tinā |
| 3. | aunty | tagata fanaua oe/tinā |
| 4. | cousin | uso o lou tamā/tuagane o lou tinā |
| 5. | grandmother | tausoga |

PESE: “A i ai Iesu i se aiga” po o le “Ua ou filifili e mulimuli ia Iesu”

A'OA'OGA:

1. E fealofani e aiga ia Iesu
2. E alolofa tagata e aiga ia Iesu.
3. O le finagalo o le Atua ia tatou amio lelei.

AUAIGA O IESU



ASO SA: **11 AOKUSO 2023**

MATAUPU: **O KONELIO O SE TAMĀ FAATUATUA MA MATA’U I LE ATUA
(ASO SA O TAMĀ)**

SINI: Ia malamalama le vasega, o le faatuatua o Konelio na ia avatu ai meaalofa e tele i tagata ma tatalo i le Aua e le aunoa.

TUSI FAITAU: Galuega 10: 1 – 4

FESOOASOANI MO FAIAOGA:

Sei toe fai faatasi mai le tatou mataupu o lenei Aso Sa. “O Konelio le tamā faatuatua” Fetaui lelei le tatou mataupu o lenei aso ma le faataua foi o nei Aso Sa a tamaiti. O ai la e faapitoa i ai lenei Aso Sa? Ioe, o le Aso Sa o tamā, o tamā uma o Samoa. Aua lea e fai mai le mataupu ‘O Konelio le ‘tamā’ faatuatua. A o ai foi le tamā lea e taua i le Tusi Paia o le tamā o le au faatuatua? Ioe o Aperaamo.

Ia faalogo lelei la tamaiti i le tatou tala lenei e faatatau foi i se isi foi tamā sa mata’u i le Atua. O le tagata la lea e igoa ia Konelio, lea e pei ona latou faitauina i le tatou Tusi Faitau. O Konelio pei ona faamatalaina sa nofo i le aai o o Kaisareia o se tasi o aai o le malo o Roma. E faapea, o le aai lea e nofo ai le tele o autau a Roma, ae o le mea lea o lo o ua i ai foi ma Konelio, ona o ia o le taitai o le toaselau i le au e igoa o Italia. A o lo o faamatalaina foi, o Konelio o se tagata amio Atua, ma e mata’u foi i le Atua faatasi ma lona aiga. O ia foi o se tagata e fiafia e tatalo, lea pei ona taua e tatalo i le Atua e le aunoa. A o se tagata foi e fiafia e fai meaalofa i tagata, fai mai na te ave ma foai atu meaalofa e tele i le nuu.

Ua oo i le tasi aso, pe tusa o le itula e tolu i afiafi a’o tatalo, na ia iloa tino ai le fa’aaliga; o le agelu a le Atua ua ulufale mai ia te ia, ma faapea mai, “Konelio” ua pulatoa o ia ia te ia, ua fefe, ona faapea atu lea o ia, “Le Alii e, se a ea?” Ua fai mai le agelu ia te ia, “Ua o ae au tatalo ma au meaalofa e fai ma faamanatuga i luma o le Atua.”

Tou te iloa la outou tamaiti, le lagona fefe lea sa ia Konelio i le taimi na pulatoa ai i le agelu; la ua alu ese atu a ua lagona lona fiafia ma le loto faafetai, ona ua ia vaia ma faalogo i le tali mai o le Atua mo ia. Ua tatou iloa tamaiti, sa faia mea uma e Komelio ma lona loto talitonu ma le faatuatua i le Atua. O le ala lea o le tali fa’aaliali mai o le Atua e tusa ma lona alofa.

O ai la se tama po o se teine e pei o Konelio sona tamā?

Uiga o Upu:

- i) Kaisareia - o se tasi o aai o le malo o Roma
- ii) taitai o le toaselau - tagata e taitai le autau, o fitafita e toaselau
- iii) amio Atua - amiontonu, amio lelei
- iv) mata’u - fefe

GALUEGA FAATINO: Tusiga Solo

Tusi sau solo e faatatau i lou tamā. (E lua fuaiupu e tai fa (4) laina i le fuaiupu)

PESE:

- 1) O Konelio o ia le taitai au
Le taitai au x 2
O Konelio o le taitai au
Le taitai o le toaselau
- 2) O Konelio e mata'u i le Atua
E mata'u i le Atua x 2
O Konelio e mata'u i le Atua
Faapea lona aigā.
- 3) O Konelio e fiafia i le tatalo
Fiafia e tatalo x 2
O Konelio e fiafia e tatalo
Leai o se masalosalo
- 4) E fai meaalofa mo tagata uma
Mo tagata uma x 2
E fai meaalofa mo tagata uma
E manuia lona iuga.
- 5) Ua silasila mai i ai le Atua
I ai le Atua x 2
Ua silasila mai i ai le Atua
I le tamā faatuatua

(fati: O lou tamā e fai lana taavale)

A'OA'OGA:

1. E silafia e le Atua mea uma.
2. E tali le Atua i le tagata lima foa'i.
3. Alofa i tagata uma.

KONELIO O SE TAMA E MATA'U I LE ATUA



ASO SA: 18 AOKUSO 2024

MATAUPU: UA FAAMALOLO E IESU LE TAGATA MA’I I PETESA

SINI: Ia malamalama le vasega. O le mana fai vasega o Iesu na malolo ai le tagata ma’i.

TUSI FAITAU: Ioane 5: 2 – 9

FESOASOANI MO FAIAOGA:

O le tatou tala tamaiti i lenei foi Aso Sa – “Ua faamalolo e Iesu le tagata ma’i i Petesa”

O fuaiupu sa tatou faitauina mai le Tusi a Ioane mataupu e 5: fuaiupu e 5 – 9. Fai mai o le tagata ma’i, sa ia te ia le ma’i i tausaga e tolusefulu ma le valu o lo o taoto i le faapaologa o le vai i Petesa. Tamaiti, o le vai lea i Petesa po o le taelega foi i Petesa, e o i ai tagata mama’i, i so o se ituaiga ma’i lava, e pei o pipili, o tauaso, o gugu ma e tino vale e faalatalata i ai, ina ia faatea ai o latou ma’i, po o le faamalolo ai foi o latou ma’i, o le mea foi lea e ta’u ai foi lenei vai o le ‘faamalogia i Petesa’ O le faiga la o lea faamalogia, fai mai, e i ai le taimi e alu ifo ai le agelu i le vai, ma gaepu le vai. O le ma’i lava la e muamua ona oso i totonu o le vai a’o gaepu, o ia lena o le a malolo ai lona ma’i.

O le ala lea o le toatele o tagata mama’i, e lolofi ane e faalatalata i le vai, ia vave ai ona tofu i totonu o le vai pe gaepu. Ina ua latalata ane Iesu i lea mea, na ia silafia ai le tagata ma’i o lo o taoto. I le silasila a Iesu, ua leva ona taoto lenei tagata ma’i. O lea na ia fetalai atu ai, “E te fia malolo ea?” A ua tali atu le tagata ma’i “Le Alii e, e leai lava se tagata na te tuuina ifo a’u i le taelega, pe a gaepu le vai, a alu ifo a’u e muamua ifo le tasi ia te a’u.” Ona fetalai atu loa lea o Iesu ia te ia. “Ina tu ia i luga, ave ia lou moega ma ia e savali.” Ia, ona malolo ai lea o le tagata ma’i, ua ave foi lona moega ma ua savali.


Ia o le tatou tala lena tamaiti, a o lea ua tatou iloa ai, o le mana faamalolo a Iesu, lea ua mafai ai ona toe malosi le ma’i o le tagata ua leva ona taoto ai i tausaga e tolu sefulu ma le valu. Aua ua na o lana fetalaina lava; e tulai ma ave lona moega ma savali, na malolo ai le ma’i. Ia manuia tele outou tamaiti.

Uiga o Upu:

- i) loa - ua umi, ua leva
- ii) taelega - vai taele
- iii) gaepu - save’u, faapefu, faa-nepu.

GALUEGA FAATINO: Faafetaui Upu (O vasega a Iesu i le nofoaga na tupu ai)

VavegaMea na tupu ai

- | | | |
|--|---|----------------------------------|
| 1. vavao le afa |  | 5,000 tagata i le vao |
| 2. liliu le vai ma uaina |  | malaga Iesu ma ona so'o i le vaa |
| 3.fafaga i i'a e lua ma falaoa e lima |  | Taelega i Petesa |
| 4. faatuina o Lasalo |  | faaipoipoga i Kana |
| 5. faamalolo le tagata ma’i tausaga e 38 |  | aiga i Petania |

PESE: 1. Iesu le faamalolo i ma’i x 4
Tagata uma o le lalolagi.

Pipili, tauaso ma ma'i vevela x 4
Faapea ma ma'i lepela

2. O e tinovale ma e gugu x 4
E malolo ia Iesu
Talitonu loa ma faatuatua x 4
O Ia o le Alo o le Atua.

(fati: Osana pepese tamaiti uma)

A'OA'OGA:

1. O Iesu le foma'i sili
2. E leai se mea e faigata i le Alii.
3. E tali Iesu i o tatou mafatiaga.

FAAMALOLOGA I LE VAI O PETESA



ASO SA:

25 AOKUSO 2024

MATAUPU: **UA VAEVUAINA E ELIA LE VAI O IORITANA I LE MANA O LE ALII**

SINI: Ia malamalama le vasega, o le mana o le Atua na fa'aalia ia Elia na vaeluaina ai le vai.

TUSI FAITAU: 2 Tupu 2: 6 – 8

FESOASOANI MO FAIAOGA:

Tamaiti, sei toe fai faatasi mai le tatou mataupu o lenei Aso Sa – Ua vaeluaina e Elia le vai o Ioritana.

O Elia tamaiti, o le tasi o Perofeta a le Atua. O se tasi o perofeta na fiafia i ai ma alofa i ai le Atua, ona o lona faamaoni i le faataunuina o le finagalo o le Atua mo Israelu, le nuu o le Atua. Ma o lea ua finagalo le Atua e aveina a'e i le lagi.

O outou manatua foi tamaiti, se tasi o fesili e masani ona fesiligia ai tatou. O ai na ave olaina i le lagi?" O lea a le tali, ia lena o Elia ma Enoka. O Elia la lea o lea e taua i la tatou mataupu. o le taimi tonu o le malaga mai po o le savaliga a Elia mai le nuu lea e igoa o Kilikala, seia oo atu i le mea tonu na aveina a'e ai o ia i le lagi e le asiosio.

Ma o le savaliga foi lea na tupu ai lea ma le vavega na faia e Elia. O lo o savavali i laua, o Elia ma Elisaia. Ua tea atu Kilikala ma Peteli ma ua oo i Ieriko. Ua vaavaai atu i Ioritana le mea o le a aveina a'e ai Elia.

Ona fai atu lea o Elia ia Elisaia. Nofo ia iinei, aua ua auina atu a'u e le Alii i Ioritana le mea o le a aveina a'e ai a'u. Ona fai mai lea o ia, o lo o soifua le Alii, o lo o ola foi oe, ou tele tuua lava oe. Ona la savavali atu ai lea. Ua o atu foi isi tagata e toalimagafulu o isi so'o o le au perofeta. Ua tutu mamaao atu i le mea e iloa atu ai, ua tutu foi laua i le auvai o le Ioritana. Ona ta'ata'ai lea e Elia o lona ofu tele, ma ua taia ai le vai, ona vaeluaina ai lea i le tasi itu ma le tasi itu. Ona la savavali atu ai lea i le iliti vai matutu.

Tamaiti tatou le ofo lava i lea mea na tupu. I le mafai lea ona vaeluaina o le vai Ioritana ina ua ta e le perofeta o Elia le vai i lona ofu tele. Ua tatou iloa foi tamaiti, o Elia o le auauna a le Atua, o lona uiga o lo o i ai foi le Agaga o le Atua ia te ia.

O le mana lea o le Atua na mafua ai ona tupu lea vavega na faia e Elia. A e le gata foi i lea tamaiti, o le talitonu ma le faatuatua faamaoni o Elia i le Atua, O le tatou mataupu lena mo lenei Aso Sa

Uiga o Upu:

- | | | | |
|------|-----------|---|-------------------------------------|
| i) | auina | - | alu i ai |
| ii) | auvai | - | luga tonu o le mea e gata ai le vai |
| iii) | ta'ata'ai | - | taai, milomilo |
| iv) | taia | - | ta |

GALUEGA FAATINO: Taliga Fesili

Filifili le tali sa'o

1. O ai Elisaia?
 - a) O le atalii o Elia
 - e) O le uso o Elia
 - i) O se tasi o le au perofeta

2. O ai na aveina a'e i le lagi?
 - a) Mose
 - e) Elia
 - i) Elisaia

3. O ai na ia ta le vai i le ofu tele?
 - a) Aperaamo
 - e) Elisaia
 - i) Elia

4. O le a le manao o Elisaia ia Elia?
 - a) Fia o ma Elia i le lagi
 - e) Fia maua le tofi o Elia
 - i) Ia vaelua mai le agaga o Elia

PESE:


Nothing is impossible when you put your trust in God
Nothing is impossible
When you trust Him in His word
Harher to the voice of God to thee
Is there anything to hard for e
The put your trust in God alone
And rest upon His word
Yes everything, yes everything
Yes everything is possible with God

E leai se mea e le mafai
Pe a e faatuatua i le Atua
E leai se mea e le mafai
Pe a talitonu i ana afioga
Faaloto ma usitai i Lona siufofoga
E i ai se isi mea e faigata mo a'u
Ia e faatutua na o le Atua
Ma e faalagolago i lona finagalo
Ioe o mea uma; Ioe o mea uma
Ioe, na o le Atua e mafaia mea uma lava.

A'OA'OGA:

1. E leai se mea e faigata i le Atua
2. E mafai mea uma i le mana o le Atua.
3. Faatuatua i le Atua e mafai ai mea uma.

VAELUAINA E ELIA LE VAI O IOROTANA



MANATU TAIALA O SETEMA MA OKETOPA: E LEOLEO MAI LE ATUA IA I TATOU.

O le tasi lenei o uiga lelei o le Atua o loo faamatalatala mai I le Tusi Paia; o le Atua e le mafai ona tuulafoai i le tagata. O soo se mea e i ai le tagata, o lo o i ai foi ma le alofa tunoa o le Atua na te taitaiina ma leoleo mai i le tagata ina ia saogalemu I mea uma e i ai.

ASO SA: **01 SETEMA 2024 (Aso Sa Talalelei.)**

MATAUPU: **UA FA'AALI IESU I ONA SOO.**

SINI: Ia malamalama le vasega, na fa'aali Iesu i ona soo ina ia suia ai lo latou le talitonu.

TUSI FAITAU: Mareko 16: 1 – 18 (mo le faiaoga)
Mareko 16: 14 – 18. (mo le vasega)

FESOOASOANI MO FAIAOGA.

O le Aso Sa lenei o lo o tatou faamanatuina ai le taunu mai o le Tala Lelei i lo tatou atunu o Samoa. O le Tala Lelei ia Iesu le Alo o le Atua lea na malii ma toe soifua manumalo mai i le oti ma le tuugamau ina ia faaolaina ai i tatou ma a tatou agasala.

O le Iesu toetu lea o lo o molimau iai le tusi o Mareko lea sa tatou faitauina i lenei taeao tamaiti. Ua mavae aso e tolu sa i ai Iesu i le tuugamau ma ua Toetu mai o Ia. Peitai, o lo o le mautonu pea ma popole le ausoo e sefulu ma le toatasi. Ua uma ona ta'u atu i ai e Maria le Makatala ua Toetu Iesu; faapea foi ma tagata e toalua sa feiloi ma Iesu i luga o le ala; ae lei mafai ona latou talitonu ai. O lea na fa'aali ai loa Iesu ia te i latou ma aoai ia te i latou ma lo latou loto maaa, ina ia latou talitonu ma o atu e talai atu le Tala Lelei lea ia te Ia. O lona malii ma lona toetu mai i le oti ma le tuugamau, o le faaolataga lea ua faia mo le faamagaloina o agasala.

O le feau foi lea mo i tatou uma, ia tatou talitonu ma faatuatua i le Tala Lelei ua aumaia e Iesu mo i tatou. Ia fai i tatou ma tagata talitonu e talai atu le Tala Lelei i isi tagata e ala i la tatou amio ia lelei.

GALUEGA FAATINO: Tali i le Sa'o po o le Sese.

1. Na talitonu le ausoo ina ua ta'u atu e Maria le Makatala ua toetu Iesu.

Tali: Sese.

2. E faaali Iesu i ona soo o lo o taooto ma aai.

Tali: Sa'o.

3. Na fetalai Iesu i ona soo ina ia aua nei o e tala'i atu le tala lelei.


Tali: Sese.

PESE: E pupuna, e pupuna

A'OA'OGA:

1. Ia fai i tatou ma soo e tala'i atu le tala lelei.
2. O Iesu Keriso lo tatou Faaola.

UA FA'AALI IESU I ONA SOO



ASO SA:

08 SETEMA 2024.

MATAUPU: **UA FAASAOINA E RAAVA TAGATA ISARAELO.**

SINI: Ia malamalama le vasega i le taua o le ola fesoasoani mo isi ina ia faasaoina le ola.

TUSI FAITAU: Iosua 2: 1 – 24 (mo le faiaoga)
Iosua 2: 14 – 16 (mo le vasega).

FESOOASOANI MO FAIAOGA.

Fai mai ua mavae le oti o Mose le auauna a le Atua, ona tulai mai foi Iosua e taitai le nuu o le Atua. Ua uma ona latou sopoia o le vaitafe o Ioritana, ma ua oo atu i lauelele o Ieriko. Ua latou malolo ai, ona auina atu loa lea e Iosua ni taulelea e o e asiasi faalilolilo i le aai o Ieriko, ina ia aumai ai se tala ina ia mafai ona latou faatoilalo lenei aai o Ieriko.

Ua taunu i laua nei i le aai o Ieriko, ona nonofo ai lea i le pale o Raava aua na fesoasoani o ia ia te i laua. Na iloa e le nuu ona latou saili ai lea i ia tagata. Na o ae i le pale o Raava, peitai na faalafi e Raava i luga o lona pale i laua nei ma lē maua ai e tagata Ieriko i laua nei. Ua faasaoina tagata asiasi e toalua e Raava ona latou fai ai lea o le tautoga pe a osofaia e Isaraelu ia Ieriko, ina ia faasaoina Raava ma lona aiga. Fai mai ua tali atu i laua nei ia Raava, o maua ola e sui ai ia te outou i le oti, pe afai tou te le ta'ua la maua feau. A oo ina tuuina mai e le Atua le nuu ia te i matou, ona matou agalelei ai lea, ma faamaoni ia te oe. Na ona uma atu lava o le upu lenei a tagata nei ona tuutuu ifo ai lea o i laua i le maea i le faamalama o le pale ma o ai loa i laua ua faasaoina i laua.

E pei ona fesoasoani o Raava i tagata ia tamaiti, e faapea i tatou. E ao ona tatou maua le loto fesoasoani i so o se tasi aua o le finagalo lea o le Atua mo i tatou.

GALUEGA FAATINO: Faatulagaga.

Toe faatulaga upu nei i lona tulaga sa'o.


1. Leagalei – agalelei
2. Mafaamala – faamalama
3. Aifetai – fetaiai
4. Litualo – tuliloa
5. Emaa – maea

PESE: O lima o Iesu, o lima agalelei.

A'OA'OGA.

1. Ia tatou loto fesoasoani i so o se tasi.
2. Ia fai i tatou ma laveai i isi tagata.

UA FAASAOINA E RAAVA TAGATA ASIASI E TOALUA



ASO SA: 15 SETEMA 2024

MATAUPU: O LE VAI O MARA.

SINI: Ia malamalama le vasega, o le mana o le Atua na magalo ai le vai oona.

TUSI FAITAU: Esoto 15: 22 – 25.

FESOASOANI MO FAIAOGA:

Ua uma ona sopoia e Isaraelu le sami ulaula, ua latou oo atu i le vao o Sura. Fai mai ua aso tolu le faigamalaga a Isaraelu, ua leai foi se vai latou te feinu ai. Ua latou oo foi i Mara, ua latou tau atu ai i le vai, peitai e lei mafai ona latou feinu ai ona o le vai e oona. O le ala lea na faaigoa ai lea mea o i ai le vai lea o Mara, ona o lona uiga lea o le oona. Ua alalaga Isaraelu ma muimui ia Mose ma fai mai, se a se mea a matou inu ai? Ona alaga ai lea o Mose i le Atua mo se fesoasoani. Ua faaali mai e le Atua ia Mose le laau ina ia lafo i le vai ina ia magalo ai. Ua lafo loa e Mose le laau i le vai ma magalo ai, ona feinu ai lea o le nuu o Isaraelu.

Tamaiti, e ui lava o le laau na lafo e Mose i le vai na magalo ai, peitai, o le mana lava o le Atua na mafua ai ona magalo le vai e ala i le laau na lafaina iai e Mose e tusa ma le faatonuga a le Atua.

GALUEGA FAATINO: Faatulagaga o Fuaiupu.

Faatulaga mai fuaiupu nei e pei ona iai i le tusi faitau.

1. Ona tuua lea e Mose ma Isaraelu le sami ulaula....
2. Ona ia alaga atu ai lea i le Alii, ona faaali lea e le Alii ia te ia o le laau...
3. Ua latou oo foi i Mara....
4. Ona muimui ai lea o le nuu ia Mose....

Tali: 1,3,4,2.

PESE: O le Atua silisili ese
E malosi ofoofogia
E leai se mea e le mafai
Ona Ia faia ha! ha!
Na Ia faia o atu mauga
Na Ia faia o vaitafe
O ona foliga na vaiaia i le lalolagi ha! ha!

A'OA'OGA.

1. E aumai e le Atua mea lelei mo i tatou.
2. E fesoasoani mai le Atua ia i tatou i taimi uma.

UA FEINU FIAFIA ISARAELO INA UA MAGALO LE VAI O MARA



ASO SA: 22 SETEMA 2024

MATAUPU: UA TULIA E IESU TEMONI.

SINI: Ia malamalama le vasega, e leai se mea e faigata ia Iesu.

TUSI FAITAU: Luka 8: 26 – 34.

FESOASOANI MO FAIAOGA:

Talofa tamiti, o le tala o le a faamatalaina i lenei Aso Sa, ua tulia e Iesu Temoni. Fai mai o lo o faagasolo pea le galuega tala'i a Iesu ma ua oo atu i le isi ituvai o le vai o Kalilaia i le nuu o Katara. Ua maliu atu o Ia i uta, ae faafetaiai mai le isi tagata ua leva ona ulufiaina e temoni. O le tagata lea tamaiti, fai mai ua le ofu i se ofu, ua le nofo foi i se fale, ae ua alu ma nofo i le mea e i ai tuugamau. O se mea uiga ese tamaiti ina ua iloa mai e ia Iesu. Ua alaga leo tele mai ia Iesu ma faapau i ona luma ma fai mai: “Se a lau na ia te au nei, Iesu e, o oe na le Alo o le Atua silisili ese?” O le tagata lenei tamaiti faimai, na fusifusia i maea uamea ma mean a faamau ai vae, peitai na motusia e ia nei maea ma ave ai e le temoni i le vao.

Ua fesili atu Iesu ia te ia po o ai lona igoa, ae tali mai o Lekeono. O Lekeono, o lona uiga; o le tele po o le toatele. O lona uiga, e toatele temoni o lo o i totonu o le tagata lea. Fai mai na aioi mai ia Iesu ina ia aua nei tuu atu i latou i le fafa, a ia tuuina atu i latou i puua. O lea na tuu atu ai loa e Iesu i latou i le lafu puua ma o atu ai ma pauu i le tofe; ona toe foi ai lea o le malosi i le tagata lea na ulufia e temoni. Ua fiafia o ia ma lona aiga ona ua toe maua lona malosi.

Tamaiti, e leai se mea e faigata ia Iesu le Alo o le Atua. O a mafatiaga e aafia ai i tatou uma, ia tatou tatalo lava ma tuu atu ia Iesu lo tatou Faaola e faamalolo mai ma laveaiina i tatou.

Uiga o Upu:

- i) Lekeono - tele po o le toatele.
- ii) fāfā - o se pu e le iloa atu le mea e gata mai ai.
- iii) tofe - mato
- iv) ulufia - nofo i totonu o le tagata.
- v) temoni - agaga leaga.

GALUEGA FAATINO: Taliga Fesili.

Tali mai fesili nei i le tala sa faamatalaina.

1. O le a le upu muamua a le temoni na valaau ia Iesu ina ua ia iloa atu o Ia?

Tali: Se a lau na ia te a'u, Iesu e, o oe na le Alo o le Atua silisili ese.

2. O ai Lekeono?

Tali: O temoni ia e toatele sa ulufiaina le tagata lea na alu ia Iesu.

3. Na faataunuuina e Iesu le manao o temoni mo i latou?

Tali: Ioe, na tuuina atu e Iesu i latou i puua ma o atu ai i latou ma pauu i le tofe.

PESE: Ou mafatiaga, ave uma ia Iesu

Aua o Ia, e alofa ia te oe (x2)


Lalo, lalo, lalo, lalo (x2)

Tulei Satani i lalo
Luga (x7)
Siitia Iesu i luga.

A'OA'OGA:

1. E leai se mea e faigata ia Iesu.
2. Ave uma o tatou mafatiaga ia Iesu.

O LE TAGATA UA ULUFIAINA E TEMONI MA IESU



O PUAA UA FEOSOFI I LALO O LE TOFE.



MATAUPU: O TAVITA LE LEOLEO MAMOE.

SINI: Ia malamalama le vasega, e faaaogaina e le Atua i tatou mo ana feau.

TUSI FAITAU: 1 Samuelu 16: 11 – 12.

FESOASOANI MO FAIAOGA.

Talofa tamaiti, o le a se aoga o leoleo mo i tatou? Ioe, mo le saogalemu o tatou uma ma le tatou atunu. A o le a foi se mea tatou te manatua ai Tavita? Ioe, sao lelei; Tavita lea na faatoilaloina Koliata le toa o Filisitia. O le tatou mataupu i lenei taeao; o Tavita le leoleo mamoe. O tatou matua, ua faaaogaina e le Atua latou te tausia i tatou o fanau. E fafaga ia ola ma ave i le aoga ina ia maua le poto. O le latou galuega lena ua tofia ai e le Atua.

E faapena foi Tavita i le avea ai ma leoleo mamoe i lona aiga. O Tavita o le uii lea o le fanau e toavalu a le toeaina o Iese i le nuu o Peteleema. O lea ua agai atu Samuelu e faauuina se tasi o le fanau a Iese, e fai ma tupu filifilia mai le Atua mo Isaraelu. Ua malaga Samuelu i Peteleema ma auai mai le fanau a le toeaina o Iese. Peitai, e lei finagalo iai le Atua mo i latou nei. Ua fesili atu Samuelu ia Iese po ua uma mai lana fanau, ae fai mai toe lava o le uii o lo o leoleo ia latou mamoe i le vao. O le galuega lea sa feagai ma Tavita i lona aiga, ai lava o lona faamaoni i le leoleoina o mamoe, ua finagalo ai le Atua e fai ma tupu ia Isaraelu.

GALUEGA FAATINO: Paso.

Sue mai upu nei, Tavita, Iese, Samuelu, Peteleema, fanau, Atua, leoleo, mamoe.

S	A	M	U	E	L	U	U	T
A	S	E	A	A	T	U	A	A
I	I	P	N	M	S	A	N	V
L	E	O	L	E	O	F	A	I
K	S	P	U	L	G	E	F	T
P	E	T	E	L	E	E	M	A

PESE: Ua agai atu Samuelu
I Peteleema
E saili i le aiga o Iese o se tupu

Tali: O Tavita o le uii
Na leoleo i mamoe
O ia lea ua filifilia e le Atua ha! ha! (fati: o le Atua silisili ese)

A'OA'OGA:

1. Ia galalue faamaoni
2. E faaaogaina e le Atua i tatou uma mo ana feau.

O TAVITA LE LEOLEO MAMOE



O SAMUELU, IESE MA LANA FANAU TOAVALU



ASO SA: 27 OKETOPA 2024

MATAUPU: IA ILOA ONA TOE FAAFOI O LE FAAFETAI.

SINI: Ia malamalama le vasega, e na o le toatasi le lepela na foi e faafetaia le alofa o Iesu.

TUSI FAITAU: Luka 17: 11 – 19.

FESOASOANI MO FAIAOGA:

E faatalofa atu i le tatou vasega i lenei taeao i le amataina o le tatou aoga mai malologa o le lotu tamaiti. O le tatou tala i lenei taeao, ia iloa ona toe faafoi o le faafetai. O le tasi lenei o tu ma aga manaia e ao ona tatou faia tamaiti. O so o se taimi lava tatou te maua mai ai se mea alofa i so o se tagata, po o se galuega lelei ua faia mo i tatou; e ao ona tatou iloa ona ave i ai le faafetai ona o le alofa ua faatinoina. O le ala lea e ao ai foi ona tatou faafetaia le alofa ma le agalelei o lo tatou Atua mo i tatou, ona e tumau pea e faavavau.

Tamaiti, sa i ai ni lepela e toasefulu sa fetaiai ma Iesu a o agai atu Ia i Ierusalem. Ua tutu mamaao mai ma alalaga pe valaau mai ia Iesu. Le Alii e, Iesu, ia e alofa mai ia te i matou. Ua fetalai atu Iesu ina ia o ma fa'aali atu i latou i Faitaulaga. O lo latou usiusitai i le upu a Iesu na mama ai o latou lepela ina ua latou o. Peitai tamaiti, o le tasi tagata o le toa sefulu o lepela; o ia o le Samaria, ua toe foi mai ia Iesu ma faapau fao ma faafetai atu ia Iesu. Ese le manaia o le mea ua faia e le tagata Samaria lea.

Ia faapea foi tatou tamaiti, aua nei galo ona toe faafoi o le faafetai. A uma foi le aso ma tatou tatalo e faafoi le faafetai i le Atua ona o lana puipuiga ia te i tatou.

GALUEGA FAATINO: Taliga fesili

Tali mai fesili nei.

1. E toafia lepela na faamaloloia e Iesu?

Tali: E toasefulu lepela na faamaloloia e Iesu.

2. O ai na fetalai Iesu i lepela e o e faaali i ai o latou tino?

Tali: Faitaulaga

3. E toafia na toe foi e faafetai ia Iesu?

Tali: E toatasi.

4. O fea e sau ai le na toe foi ia Iesu?

Tali: E mai Samaria.

PESE: E toasefulu Lepela na o
E toasefulu na faamalolo
E toatasi na loto faafetai
Ae toaiva, e leai
O i latou na, na mau i le aai
Na tau valaau ia Iesu e afio mai
E leai o se vailaau
Ua na o Iesu o le vai tumau.

A'OA'OGA:

1. Ia iloa ona faafai le faafetai i soo se tasi e alofa ai mo i tatou.
2. Ia tatou faafai le faafetai i le Atua ona o mea tatou te ole atu ai.

LEPELA E TOASEFULU UA VALAAU ATU IA IESU



LEPELA E TOATASI NA FOI E FAAFETAIA IESU



MANATU TAIALA O NOVEMA: O LE ATUA TATOU TE MANUIA AI

O a'oa'oga uma lava a le Tusi Paia o lo o faapupula mai ai le leai lava o se isi e afua mai ai le manuia mo i tatou uma. Ua na o le Atua lava, o le ou mea uma lava. O lana faasoa ma lona alofa mai mo i tatou, lea ua tatou maua ai manuia e tele.

ASO SA: **03 NOVEMA 2024**

MATAUPU: **O LE ALOFA TUNOA O LE ATUA.**

SINI: Ia malamalama le vasega, o le alofa tunoa o le Atua, e tali mai ai i so o se mea tatou te ole atu ai.

TUSI FAITAU: Luka 11: 9 – 10.

FESOASOANI MO FAIAOGA:

O le tatou mataupu o le a talanoaina i lenei taeao tamaiti, “E tali mai le Atua pe a tatou tuitui atu.” E sao lelei lava le tatou mataupu, ona o le Atua o le alofa tunoa, e alofa mai foi o Ia ia i tatou i taimi ma aso uma o lo tatou ola. A o le faaaogaina o le upu tuitui tamaiti; manatua foi, afaei ae tatou o atu i se fale o se aiga, aemaise lava i fale palagi, e ao ona tatou tu’itu’i muamua le faitotoa ona faatoa tatala mai lea. Peita’i, sei vagana ua leai nisi i le fale faatoa le mafai lea ona tatala maim o i tatou. Peitai, o le Atua so o se taimi lava e tatala mai lava le avanoa mo i tatou uma.

Ua a'oa'oina foi i tatou ia toaaga e tatalo, o le uiga foi lea o le fetalaga po o le upu a Iesu o lo o fetalai ai. E tutusa lava le ole, saili ma le tu’itu’i ma lo tatou tatalo i le Atua i mea tatou te mananao ai. Afaei tatou te ole atu i le Atua ona foaiina mai lea e Ia mo i tatou. Afaei tatou te saili atu i le Atua, ona tatou maua ai lea; afaei foi tatou te tu’itu’i atu i le Atua ona toina mai lea e Ia mo i tatou o mea uma ua tatou tatalo atu ai. E pei ona tatou ole atu ina ia maua le poto, tatou saili atu ina ia maua le malosi, ma le tele o mea tatou te mananao ai.

GALUEGA FAATINO: Faatumu avanoa.

Faatumu avanoa i upu nei, ole, tu’itu’i, saili.

Ou te fai atu foi a'u ia te outou, Ia outou atu, ona foaiina mai ai lea ia te outou; ia outou, ona outou maua ai lea; ia outou atu, ona toina mai ai lea ia te outou. Aua ai se atu, e maua e ia, o le, e iloa e ia; o le, e toina mai ia te ia.

PESE: Tu’itu’i, o ai o lo o i na
 Faalogo, faalogo, ae aua le pisa
 Tatala, tatala,
 Ma vaai atu
 O Iesu lena o lo o tuitui mai.

A’OA’OGA.

1. Ia tatou ole atu i le Atua i mea uma tatou te mananao ai e ala i le tatalo.
2. E le uma le alofa o le Atua mo i tatou.

3. E tuu avanoa mai pea le Atua mo i tatou.

IA TUITUI ATU



IA TATOU TU'ITU'I, SAILI MA OLE ATU I LE ATUA E ALA I LE TATALO



ASO SA:

10 NOVEMA 2024

MATAUPU: UA FAATOGA SOLOMONA I LE ATUA.

SINI: Ia malamalama le vasega, o le Atua na maua ai e Solomona le poto.

TUSI FAITAU: 1 Tupu 3: 7 – 14.

FESOASOANI MO FAIAOGA:

O le tatou tala i lenei Aso Sa, “Ua faatoga Solomona i le Atua.” O ai foi le tupu poto? Ioe, o Solomona le tupu poto. Fai mai ua maliu Tavita sa fai ma tupu ia Israelu, ua tulai mai Solomona e sui i lona tama o Tavita. Ua iloa foi e Solomona, e le faigofie lana galuega o le a feagai ai; ua na o le Atua lava e maua ai lona fesoasoani. O le isi foi tulaga, o Solomona e le o se tagata ua matua, a o se tagata talavou. O lea na ia faatoga ai loa i le Atua ina ia foai mai ia te ia le loto matala e faamasino ai i lona nuu ua toatele naua.

Tamaiti, na faafogaina e le Atua le faatoga a Solomona. Ua le gata o le loto matala; o le loto poto e faamasino ai, ae ua foaiina foi e le Atua le mamalu ma le tamaoaiga mo Solomona ina ia leai se tupu e tusa ma ia i ona aso uma. Manaia tele le mea ua valaau ai Solomona i le Atua a tamaiti, ae a tatou, ioe, o loo tatou tatalo pea i le Atua e foa’iina mo i tatou le poto. E mautinoa e aumai e le Atua, pe afai tatou te toaaga i le aoga, ma ia tatou savavali i ana poloaiga i aso uma o lo tatou ola.

Uiga o Upu:

i) faatoga – aioi, tatalo, faanoi.

GALUEGA FAATINO: Upu faafeagai.

Tusi mai upu e uiga faafeagai ma upu nei.

1. Mauoa (mativa)
2. Ita (filemu)
3. Leaga (lelei)
4. Poto (valea)
5. Tupu (auauna)
6. Oti (ola)

PESE: O le poto e taua
 I le olaga, o le tagata
 E leai se mea e oi ai lou loto
 Pe a e mauaina o le poto.

A’OA’OGA:

1. O le Atua tatou te maua ai le poto.
2. E foaiina e le Atua mea uma mo i tatou pe a tatou usitai i ana poloaiga.

UA FAATOGA SOLOMONA I LE ATUA



ASO SA: 17 NOVEMA 2024

MATAUPU: **UA FAIA E IESU LE VAVEGA I KANA.**

SINI: Ia malamalama le vasega o le mana o Iesu na liua ai le vai e fai ma uaina.

TUSI FAITAU: Ioane 2: 1 – 10.

FESOASOANI MO FAIAOGA.

Sa i ai Iesu faatasi ma ona soo i le faaipoipoga sa faia i le aai o Kana i Kalilaia. Sa i ai foi ma le tinā o Iesu i lea aiga tele lava. Sa tele le inu uaina o tagata, ona fai atu ai lea o Maria ia Iesu, ua leai sa latou uaina. Na lei mautonu Iesu ma faapea atu i lona tinā e lei oo i lona taimi. Peitai, na fai atu Maria i auaua, so o se mea e fai mai ai o Ia ia outou faia.

Na faatonuina e Iesu auaua ina ia latou faatutumuina maa tetele i vai. Ua faapea ona latou usitai ia Iesu, ua faatutumuina ona fetalai atu loa lea o Iesu ina ia asu loa ma avatu i le pule o le tausamaaga. Na faateia le pule o le tausamaaga ina ua sili atu le uaina ua mulimuli atu nai lo le uaina na muai tufatufaina atu mo i latou.

Ioe, e ui lava i le le mautonu o Maria ina ua leai se uaina, peitai ua faia lava e Iesu le vavega i lona mana e ala i le liua lea o le vai e fai ma uaina.

GALUEGA FAATINO: Paso

Saili mai upu nei i le paso. (Upu – tausamaaga, Iesu, Kana, Kalilaia, tina, maa)

M	S	G	I	V	E	I	R	F	O
U	T	T	E	G	O	K	I	A	L
T	A	U	S	A	M	A	A	G	A
I	K	P	U	L	S	N	F	I	A
N	O	U	K	U	I	A	F	U	M
A	U	K	A	L	I	L	A	I	A

PESE: E alofa Iesu ia i tatou uma.

A'OA'OGA:

1. E faia e Iesu vavega i lo tatou ola.
2. E fesoasoani mai Iesu i lo tatou vaivai.

UA FAIA E IESU LE VAVEGA I KANA I KALILAIA



ASO SA: **24 NOVEMA 2024**

MATAUPU: **UA FASIA E SAMASONI LE LEONA TAANOA.**

SINI: Ia malamalama le vasega o le malosi o Samasoni e mai le Atua.

TUSI FAITAU: Faamasino 14: 5 – 6.

FESOASOANI MO FAIAOGA:

O Samasoni tamaiti, o ia o le naseri a le Atua. O lona uiga, o ia lea ua vavaeeseina mo le Atua na te faatinoina le finagalo o le Atua; aemaise lava mo Isaraelu lona nuu filifilia. O Samasoni foi, e le inu i se ava po o se uaina, e le oo foi se tafi i lona lauulu. E ui o lona malosi lea i le matau a tagata, peita'i, o le Atua lava lona malosi sili na ia faia ai mea e le mafai e se isi lava tagata ona faia.

O le tasi lenei o faatinoga na faia e Samasoni e le mafai lava e se isi ona faia, o lona fasi mateina lea o le leona taanoa e pei ona i ai le tatou mataupu i lenei taeao. Fai mai na o malaga Samaoni ma ona matua i le nuu o Timenata. Ua oo atu i le mea e iai Tovine o le nuu lea, ua tu mai ai le leona taanoa ua tagi mai ia te ia. Ua osofia Samasoni e le Agaga o le Atua ona ia fasia ai lea o le leona e pei o se ot. O le tulaga lea ua tau mai ai ia te i tatou, o le Atua na aumai ai le malosi uiga ese lea na manumalo ai Samasoni i le leona. Ua aoao mai ai foi mo i tatou, e leai lava se isi tatou te maua ai le malosi sili ua na o le Atua lava.

Uiga Upu:

i) taanoa – manu fafine e lei oia/fanau/faia sana tama.

GALUEGA FAATINO: Taliga Fesili.

Tali mai fesili nei mai le tala sa faamatalaina.

1. O fea na o iai Samasoni ma ona matua?

Tali: Na o i Timenata.

2. O fea na feiloai ai Samasoni ma le leona taanoa?

Tali: I le nofoaga e i ai tovine o Timenata.

3. O le a le uiga o le upu Naseri?

Tali: O le tagata ua vavaeeseina mo le Atua ma lona finagalo.

PESE: Faalagolago i aao o Iesu

A'OA'OGA:

1. Faalagolago i le Atua tatou te manumalo ai.

2. O le Atua lo tatou malosi sili.

UA FASIA E SAMASONI LE LEONA TAANOA



MANATU TAIALA O TESEMA: O LE ATUA UA AFIO MAI I LE LALOLAGI

O le Atua ua afio mai i le lalolagi, o Iesu lea na afio mai e faatino le faaolataga mo tagata uma. O le Mesia, o le Faaola, o le Atua ua liu tino tagata ina ia mafuta ma militino faatasi ma le tagata. Na faailoa mea uma o le malo o lona Tamā o i le lagi.

ASO SA: **01 TESEMA 2024**

MATAUPU: **UA FANAU MAI IESU LE FAAOLA.**

SINI: Ia malamalama le vasega, na fanau mai Iesu i le falepovi.

TUSI FAITAU: Luka 2: 1 – 7.

FESOASOANI MO FAIAOGA:

Talofa tamaiti, faafetai i le alofa o le Atua ua mafai ona tatou aulia mai le masina faaiu o lenei foi tausaga. O le tatou mataupu o le a faamatalaina; ua fanau Iesu Faaola. Fai mai ua oo i ona aso e fai ai le tusiga igoa i Peteleema i lalo o le poloaiga a Kaisara Aokuso. Ua malaga ai foi ma Iosefa ma Maria, a o to Maria ma tauave i lona manava le tama o Iesu. Ua oo atu i latou i Peteleema, ae ua le maua so latou avanoa i fale e tali ai malo; o lea na latou api ai i le fale povi. Ua oo i ona po e fanau ai Maria, ona ia aui lea o Iesu o lana tama ulumatua ma faataoto ia te Ia i le falepovi.

Ioe, amuia i tatou tamaiti, auā o le toetele o i tatou sa fananau uma mai i le falemai, taooto i moega ma mea lelei. A o lo tatou uo o Iesu na fanau mai o Ia i le falepovi. E ao ona tatou manatua le fanau mai o Iesu aua o Ia lea o lo tatou Mesia ma lo tatou Faaola, na auina mai e lo tatou tama o i le lagi.

GALUEGA FAATINO: Faatinoga

Faatino le tala ma fesoasoani iai lau susuga i le faiaoga i tamaiti.

PESE: Ua fanau mai o Iesu i Peteleema.

A'OA'OGA:

1. Ua fanau mai Iesu le Mesia.
2. Ia tatou talia le fanau mai o le Faaola i le falepovi.

UA FANAU MAI IESU I LE FALE O MANU



ASO SA: **08 TESEMA 2024**

MATAUPU: O MEAALOFA A MAKOI MO IESU.

SINI: Ia malamalama le vasega, e faapei ona fai meaalofa o Makoi mo Iesu, e faapea foi i tatou.

TUSI FAITAU: Mataio 2: 9 – 11.

FSOASOANI MO FAIAOGA:

O lea ua tatou oo mai i le vaitau o le tausaga e tele na fai meaalofa ai le isi i le isi. Meaalofa mo matua, o lou uso, o lou tuafafine, tuagane, o ou aiga faapea foi ma uo. A o le vaitau foi lenei na o ai makoi ma a latou foi meaalofa mo Iesu.

O makoi, o tagata popoto ma atamamai i le faitauina o fetu ma feau e faailoa mai ai. Na latou vaiaia le fetu i sasae ma latou iloa ai o le a fanau mai se tupu. O lea na latou malaga ai loa e saili le tama ma taumulimuli ai pea i le fetu. Fai mai ua latou maua le mea na fanau ai Iesu, ua latou ulu atu i le falepovi ma latou iloa ai Maria ma lana tama, ona latou ave ai lea o a latou meaalofa; o le auro, ma le pulu lipano, ma le pulu muro. O mea nei tamaiti, o maa taua e anagata ma e taugata foi pe a faatauina. Matagofie meaalofa ua saunia e makoi mo Iesu; ae a tatou, ua tapena ni a tatou meaalofa mo Iesu? Meaalofa lelei lava lena o le usitai ma faalogo lelei i matua, ia tatou faamaoni foi; e fiafia mai ai Iesu ia i tatou.

Uiga o Upu:

- i) Auro – maa taua e taugata
- ii) Pulu lipano – uu manogi
- iii) Pulu muro – uu manogi

GALUEGA FAATINO:

Faatumu mai avanoa i upu nei. (ulufale,tama,Maria,ifo,oloa,auro,lipano,muro.)

Ua latou atu i le fale, ua latou iloa ai le itiiti ma lona tina, ona latou faapauu ai lea, ma atu ia te ia; ua talai foi o latou, ona latou avatu ai lea ia te ia o mea alofa, o le, ma le pulu, ma le pulu

PESE: E toatolu tupu na o.

A'OA'OGA:

1. Ave sau meaalofa mo Iesu.
2. O le a sau meaalofa mo ou matua i lenei tausaga?

O MAKOI MA A LATOU MEAALOFA



UA AVATU E MAKOI MEAALOFA MO IESU



****MANUIA LE KERISIMASI MA LE**
TAUSAGA FOU**